


10-08
1-2



t 191



766809

永樂大典卷之二萬二千九百二十九

一送

宋

高宗一百七十一

中興聖政建炎元年五月庚寅上以四方勸進群臣固請即皇帝位于
南京以汪伯彥中興日曆耿延禧中興記參修臣等曰堯舜所以獨高百
 王者以其得天下及其傳天下而知之湯有慚德武未盡善况於後世乎
 漢高帝唐太宗號為盛主然其得天下也以爭其傳天下也幾以致亂大
 哉太祖皇帝之受命與太上皇帝之中興也謳歌獄訟歸而不釋則不得
 已而履大位及夫為天下得人則舉成業授焉不詢群臣不謀卜筮惟視
 天意之所在而已自堯舜以來數千載始有太祖及我太上皇帝豈非希
 闊甚盛之際哉六月甲子詔徽猷閣待制邢煥授觀察使時諫官衛膚敏
 論煥后父不當除待制孟忠厚隆祐太后兄子不當除直學士煥即有是
 命而上以太后故不忍罷忠厚職名於是給事中劉珣中書舍人汪藻引
 故事極論之膚敏改中書舍人言所論不行不敢就職明年正月丁未卒
 授忠厚承宣使且詔后族勿任侍從官著於令以汪伯彥時政記及汪藻



所記參修。臣等曰。臣聞章獻明肅太后垂簾時。外戚馬季良為待制。仁宗親政。於明肅之政。無大變更。獨季良即日易武弁。以為祖宗之制。不可以私恩廢也。太上皇帝奉隆祐太后至矣。而不敢抑言者。以私忠厚。嗚呼。此我家法。萬世所當守也。臣是以詳著之。辛亥。赦書拘籍天下神霄宮貲。產錢穀。付轉運司。以充省計。先是即位。赦書已罷神霄宮。至是復申諭焉。丙午。又詔道士林靈素。鄭知微。傳希烈家貲。令溫處州籍沒。以汪藻所記修入。臣等曰。晉以老莊清言亂天下。車轍既東。而君臣莫知創艾。卒以不振。建炎中興。首黜方士之害。丁寧切至。如救焚拯溺。然非上聖。其孰能之。乃者方士稍稍以附託干恩澤。特旨冠其徒至數十人。侵害度牒法。歲給緡錢以千數。而齋醮祈禳。猶不與也。雖間采近臣之議。寢而弗行。然此門要不可啟。臣等敢論著本末。以備覽觀焉。辛巳。詔以知南康軍李定。通判韓琦。便宜誅許高。許亢。特轉一官。先是。臣僚論靖康末。折彥質為宣撫副使。錢蓋為制置使。高亢總兵守河。皆不戰而遁。今置不問。則後何以使人。詔彥質責授散官。昌化軍安置。蓋落職。官觀。高亢編管海外。會南康奏高寓其境上。欲謀變。定禱以便。宜誅之。而待罪宰相李綱奏曰。淵聖委高亢守河。付以兵甚衆。賊將至而先走。朝廷不能正軍法。而一軍壘守倖

敢誅之。必健吏也。使後日受命扞賊者。知退走而郡縣之吏有敢誅之者。其亦少知所戒。是當賞。上曰。然。乃有是命。以李綱時政記修入。臣等曰。古之守封疆者。皆知進未必死於敵。而退必死於法。故援枹而鼓之士。爭致命。以為進猶或生。而退必死也。况受命為大將。任安危成敗之寄者乎。三代聖人。仁民愛物。忠厚惻怛至矣。然其出師不用命者。必戮弗赦也。太上皇帝之英斷。後世可忽忘哉。丙戌。詔京東京西河北永興軍淮南江南兩浙荆湖路皆置帥府。要郡次要郡帥府為安撫使。帶馬步軍都總管。要郡帶兵馬鈐轄。次要郡帶兵馬都監。皆以武臣為之。副改路分為副總管。路鈐轄為副鈐轄。州鈐轄為副都監。總管鈐轄司。許以便。宜行軍馬事。辟置僚屬。依帥臣法也。兵各有差。遇朝廷起兵。則副總管為帥。副鈐轄都監。各以兵從聽其節制。正官願行者聽。轉運使副一員隨軍。一員留本路提點刑獄。彈壓本路盜賊。遇有盜賊。則量敵多寡。出兵會合。以相應援。以李綱時政記修入。臣等曰。昔太祖皇帝監唐末五代方鎮強。王室弱之弊。故削鎮兵。以尊京師。暨我太上皇帝親見靖康以來。群盜充斥。郡邑無備之患。故屯兵諸郡。且責提點刑獄。以警備盜賊。扶偏補弊。可謂各適其時矣。乃者郡邑安於無事。武備寢闕。一有非常。且復蹈前日之害。故臣具述

其詳以待制詔行焉。十月丁巳，駕自南京登舟，巡幸淮甸。戊辰，宰執登御舟奏事。上曰：「昨日有內侍至自京師，進內府珠玉二囊，朕投之汴水矣。右僕射黃潛善曰：『可惜，有之不必棄，無之不必求。』」上曰：「太古之世，璚玉毀珠，小盜不起，朕甚慕之。庶幾求所以息盜爾。」先是六月丁亥，上諭宰執東京有司發到內庫寶器，有玻璃碼碯之屬，皆遐方異物，內侍陳列以進。朕念玩物喪志，悉令碎之於殿庭。以李綱汪伯彥時政記參修臣等曰：「方承平無事，時陳寶玉，飾珠璆以為玩耳。嗚呼！安知是物之足以敗天下而召寇戎也？」太上皇帝身履艱難，撥亂中興，其視是物猶螻蛇鵙毒，肯復親之耶？碎寶器棄珠玉，臣知出於至誠惻怛，非如唐明皇焚錦繡，姑以飾一時虛譽而止也。十二月丁巳，詔朕側身寅畏，與二三大臣宵旰圖治，罔貴奇玩，罔好畋游，罔昵近習，使干政事。罔有斜封黑勅，以濫名器。夙夜正心持誠，祈天助順，聞小人為姦，或欺誕請屬，以鬻官爵，或臂鷹走犬以事畋獵，而率以御前為名，使朕之好惡何以昭示四方？格于上帝，其令三省樞密院榜諭戒約言事官覺察彈奏，敢有違者，重寘于法。並許人告賞錢一千貫。內畋獵之人，輒稱御前鷹犬者，根治得實，配沙門島。以汪藻所記修臣等曰：「春秋之義，王者無外，天下王者家也。善乎諸葛亮之言曰：『宮中

國中當為一體。往者閤寺與姦臣相表裏，動挾御前之名以脅制上下，卒成天下之禍。臣讀是詔，至于大息流涕，嗟乎！此建炎紹興之政，所以赫然有祖宗風烈也。」建炎二年四月己未，詔惟京畿京東西河北河東陝西依已降指揮置巡社，餘路悉罷。時杭溫州已就緒，奏乞存留，亦弗聽。以汪藻所記修臣等曰：「唐中葉以後，府衛之制盡廢，至梁涇人為軍，於是兵民遂分。雖以周世宗之善治兵，我太祖太宗之神聖英武，且去唐未遠，而兵民已不可復合矣。治平以來，學士大夫乃始欲追古制而復之，識者固知其難矣。一變而為義勇，再變而為保甲，三變而為巡社，法非不古，而習俗已成，復之無由。此太上皇帝所以不憚改令以安元元也。」庚申，詔御前軍器所見織戰袍工匠發還綾錦院，令依限織進。初，命監綾錦院姜渙擇良工就御前軍器所專織戰袍，欲以賜有功將士。中書侍郎張慤等言於上曰：「前日中人因事輒置局，紊亂紀綱，不可不深鑒。今若以織文責綾錦院，而使少府監督其程限，則事歸有司，於體為正。」上曰：「甚善，故有是命。」以汪伯彥時政記修臣等曰：「臣聞明主之察治亂也，審而守法度也，堅寧逆志，拂心弗便於事，而常戒懼於細微孽芽之間，不敢忽也。夫取工於綾錦院，而織袍於軍器所，又以賞功，由常人觀之，誠若無甚害。然太上皇

帝矍然改令不俟終日何哉官失其守而事奪於貴臣法廢其舊而制出於一切則亂由之而作有不難矣嗚呼治亂之機如此其微也非明主其孰察之乙丑上諭宰執曰昨日有內侍輒奏曰比侍講筵竊聞講讀官某敷陳甚善陛下必亦謂然臣輒撰獎諭詔書進呈朕曰臣僚一時恩禮當出朕意非小臣所得預若降詔書自有學士汝等各有所職事豈宜不安分如此况此詔書詞既未工又不知體取笑外人上因曰朕每退朝過屏風後押班以下欲奏事者朕亦正衣冠再御座聽其所陳未嘗與之款暱性亦不喜與婦人久處多在殿旁閣子垂簾獨坐筆硯外不設長物靜思軍國合行大事或省閱四方章奏左右止留小黃門二人一執事一磨門至於內中掌文書亦多是前朝老官人有來奏事者朕亦出閣子外處分畢却入閣子坐無一日不如是也汪伯彥時政記修入臣等曰閹寺之禍著矣佞柔側媚以狗馬聲色惑其君禍之小者也劇略書傳誦說古今以才藝自售則其為禍豈易測哉建炎之初天子厲精求治而宦者技隙肆言猶敢如此亦可謂姦人之雄矣非聖武英斷絕其萌芽則基亂胎禍將何所不至嗚呼方其伺顏色售才藝能赫然拒絕之固已難矣又慕其情狀告大臣豈不甚難哉至於清心寡欲屏遠聲色皆中興之本臣是以

論著之詳焉七月丁亥楚州發歸朝官至行在上諭宰執曰聞州郡多囚繫此輩久者至經歲不得釋少涉疑似則殺之覆燾間皆吾赤子也朕欲發諸郡拘囚歸朝官盡赴行在存撫之庶幾可召和氣汪伯彥時政記修入臣等曰古之王者蓋有殺一不辜而得天下則弗為者矣彼姦雄悉酷之言至曰寧我負人嗚呼人之用心何止天壤之異哉方建炎之初所在盜起如蝟窮荒絕漠狼子野心之人錯處郡縣有司為之禁防或未過也而太上皇帝惻然哀矜形於聖訓不以防亂備患而忘濫刑之戒不以艱危多事而廢好生之心凜然有三代王者之遺風矣是豈秦漢以來所能髣髴哉八月癸丑臣僚請復常平官講補助之政廣儲蓄之具從之十月壬戌詔常平之法歲久多弊頃以紹述為名雖知有公私不便當增損更易者亦莫敢言今止為常平本法所繫甚大非他司兼領故復置提舉官尚慮蹈襲前弊反致害民可明諭天下青苗散歛法永勿復行其餘條制令葉夢得孫覿張徵討論以聞汪伯彥時政記及汪藻所記參修臣等曰常平之法尚矣穀賤則糴穀貴則糶無散歛之煩而有救災之實公私俱便農末皆利天下之良法也孟子譏狗彘食人食而不知檢塗有餓莩而不知發使孟子而為政於天下常平之法必在所取矣彼青苗

出於近世。蓋非常平之舊。建炎之初。廢青苗以利民。而有司奉行失措。至侵耗常平之積。此詔書所以丁寧繼下也。今官存而事寢弛。法具而吏費虐。意者朝廷仁愛之心雖至。而責實之政尚寬歟。臣故著初詔于篇。願有稽焉。乙亥。上御殿策進士。九月庚寅。賜李易等及第出身。同出身。初。有司欲以上十人所對策進呈。且請以上意定名次。上却之曰。朕委主司取士。必不錯。乃悉從所擬。不復更易。以汪伯彥時政記及汪藻所記參修。臣等恭惟太上皇帝當建炎之初。策士于廷。一委主司。不以一人之好惡為之升黜。天下之至公也。及紹興中。權臣罔上。假國家之科目。以私其子弟親戚。則聖斷赫然。拔寒畯。抑權貴。亦天下之至公也。惟一出於至公。故靜則為天地之度。動則為神明之斷。傳曰。公生明。太上皇帝實有焉。建炎三年三月辛巳。臣僚上言。宜倣唐制。及祖宗舊制。應章奏翰林學士。給事中。中書舍人。輪日於禁中看詳條陳具奏。使是非與奪盡從公論。左右小臣不得妄言利害。既委臣僚。乞不差內臣轉送。只實封往復。庶免黨與交結之弊。詔從之。以路允迪時政記條入。臣等曰。人主親決天下事。而不以假臣下。未為甚害也。然天下之亂。往往輒生於此。秦始皇。隋文帝。唐德宗。皆是聰明過人。無待輔助。於是疎間群臣。厭忽公論。而不知近習小人。

已陰竊其柄矣。太上皇帝深鑒前代之禍。博采在廷之議。以看詳章奏。專責儒臣。使左右小臣無所投其隙。防微杜漸至矣。今天子即位之初。首詔兩省。分閱公車之奏。條流來上。實遵建炎故事也。聖聖相繼。出於一道。蓋多類此。嗚呼盛矣。四月乙卯。赦書。仁宗皇帝在位四十餘年。恩結民心。社稷長久。應仁宗法度。理合舉行。元祐大臣。雖累降處分。盡還官職。恩數尚慮未盡。霑恩。其令本家自陳。有司疾速施行。先是元年六月赦書。舊係籍及上書人。悉還其元任官職。及贈謚碑額等。至是復申救焉。臣等曰。臣竊觀三代以來。風俗忠厚。莫若我宋。世世修德。澤被天下。最久莫若仁宗皇帝。此太上皇帝所以慨然發德音也。天監在上。克相聖志。海內乂安。年穀屢豐。於萬斯年。無疆維休。則亦躬享仁宗黃耇之福。可謂盛矣。元祐大臣。勲德相望。中更黨錮之禍。其死於紹聖崇寧之前者。嘗被恩數。固可還之矣。其間不幸沒於謫籍之後者。謚所以易名。而或未盡。議贈官。所以念功。而或未盡。舉碑額。所以旌賢。而或未盡。賜意者。太上皇帝之心。將以啓迪嗣聖。故略而未行。以俟今日歟。此議即博士之責也。五月辛巳。巡幸次鎮江府。上謂宰相呂頤浩等曰。張愬古之遺直。陳東誅死。可念二人。皆葬郡境。已降親札。令有司致祭。卿等更議卹其家。癸未。中書舍人張忞被

旨引對甲申上謂順浩等曰張恣謂朕即位以來無纖毫之失自古人君不患無過患不能改過耳恣諛諛如此豈可寘之從班可黜之於是詔恣落職官觀以呂順浩張浚時政記汪藻所記參脩臣等曰武王克商有下車而為之者有未及下車而為之者建炎中太上皇帝擲風沐雨日不暇給而汲汲於褒忠直去佞諛辛壬癸甲未越信宿聖政可以傳後世者三焉抑可謂明所先後矣然臣伏觀是時上方勵精政事躬行勤儉張恣稱述以為無纖毫之失亦未為甚過也而聖斷赫然屏遠斥絕之惟恐少緩臣知欺罔譏匿之姦固無所容矣是誠中興之本也丙戌詔曰建康之地古稱名都既前代創業之方又仁祖興王之國朕本繇代邸光膺寶圖載惟藩潛之名寶符建啟之義蓋天人之允屬况形勝之具存興邦正議於宏規繼夏不失於舊物其令父老再覩漢官之儀亦冀士夫無作楚囚之泣江寧府可改為建康府其節鎮舊號如故臣等曰建炎初載重違汴都父老之意是以車駕所臨止曰巡幸示不忍去故都耳然自古未有為國數十年而無定都者江左之必居建業猶中原之必居雍雒天造地設無可更議矣王師北討非盡復燕趙并代雖得河南未可以舍建業而北也自古披草萊立都邑不數年遂致富盛者多矣况經營如是之久乎臣

故具載初詔冀天子有感焉八月戊申上曰昨日吳國長公主入內以畫及小玉山玉管筆為獻朕對以平生不識畫因而不好長主可惜錢買此遂并玉山等復還之以王綢時政記脩入臣等曰昔宋高祖未備音樂湯仲文以為言帝曰日不暇給且所不解仲文曰屢聽自然解之帝曰政以解則好之故不習爾蓋耳目之玩解生於好好生於解惟澹然清靜則物莫能入太上皇帝體堯蹈舜固非區區宋高祖所能仰望然其言有適用者臣是以著之以見開國治謀之君躬履艱難崇尚儉約大抵皆如此也閏八月丙戌上與宰執論借補官資之弊曰三十年來爵秩冒濫日甚一日政和宣和則以應奉花石之類補授官爵遂輕自宣和末以來軍興借補猥冗不可勝計小使臣關止二萬餘今借補者何啻三五十萬將來事平未知何以處之以王綢時政記脩入臣等曰借補猶前代假版之類爾雖甚冗濫一旦朝廷澄清之猶可為也而太上皇帝已慮之如此乃者軍興賞功至五十萬有奇往往貿亂相乘又皆真命一子不可復奪天子雖當宁太息思有以革其弊而有司安常習故終未能仰承上意也臣誠竊憂之敢論著于篇以備省覽丙申主管順遞官奏巡幸日迫費竈器皿不備請惟給衛士蒸餬熟猪肉上曰今來巡幸豈可搔擾如朕昨勿

遶渡江。被褥亦不以自隨。偶攜得一貂皮披卧。蓋各半。未嘗取索一物。而有司借湯瓶至四百枚。不知何用。只今可出黃榜告諭。所過州縣。除蒸餬外。皆勿供。如違。當重寘之法。以王綽時政記修入。臣等曰。前代當多故時。人主務行姑息之政。往往反以階亂。獨太上皇帝神武英睿。深鑒茲弊。以為人主猶暴衣露蓋。蒙犯霜露。宿衛之士。得飽餅餌多矣。其可重困吾民哉。故戎寇雖深。而軍律愈整。艱危雖極。而民心不離。卒以中興大業。垂裕萬世聖矣。夫游被命修光堯皇帝聖政草創九例。網羅放逸。雖寢食間未嘗置也。然不敢以橐留私篋。暇日偶追記得此命。見輩錄之。隆興二年十月一日。左通直郎通判鎮江軍府事陸游記。紹興辛巳親征錄周益公紹興辛巳親征錄。紹興三十一年歲在辛巳十月辛丑朔陰。手詔金虜叛盟。將親征。其文洪景盧所草。前一月人已知之。癸卯雨除三招討使吳玠。報九月十八日遣將彭清。劫金人大寨於寶鷄橋。知均州武鉅奏。招到北界杜海。皆朝等二萬餘人。老小數萬口。獲首生擒二百餘人。池州都統李顯忠奏。與金人三戰於正陽西。敗之。此月三日也。時虜騎已縛橋踰淮。吳玠奏九月二十七日克秦州。戊午。晴。張真甫供職。葉義問督視江淮。荆襄軍馬。虞允文參謀軍事。義問辟洪邁。馮方同行。時虜騎大入。諸將多敗奔也。庚申陰。

晴相半。聞王權與金人戰于和州境。人情大洶。辛酉午後。出北關。送葉樞。矜氣大言。識者憂之。行府犒軍金帛。絡繹于道。邵宏淵黃旗走報。與金人戰于六合。先是諸將每遇敵。輒以捷告。都人望旗呼舞。尚書省揭黃榜於通衢。不移刻。摹印徧都下。驗其地。則皆自北而南。實未嘗有所獲也。

壬戌。聞虜陷真州。邵宏淵雖力戰於六合。兵少不能禦。故也。甲子陰。聞虜陷揚州。百官宅遷徙一空。十一月己巳朔。霜晴。人情稍舒。劉錡報阜角林大捷。先是錡提軍駐淮東清河口。與虜兵相持。而元顏亮親率大軍別從淮西入寇。李顯忠遇之。即遁。遂與王權戰于廬子。和權退舍。屢敗。亮自滁入真。邵宏淵又不能當。亮兵將繞出。錡後錡知不敵。即捨清河。歸維揚。焚廬舍芻糧。南歸。虜遂兩道入矣。亮至阜角林。錡與戰。敗之。捷書聞。上大喜。遣中使賜與甚厚。丙子。聞此月五日。李橫敗績於瓜洲。初。劉錡既捷。即卧病。與歸京口。虜遂臨江。葉義問督錡進戰。錡不可。亦以病。實不能行。義問乃命橫將兵過江。方交鋒。虜分兵為左右翼。潛出橫後。夾攻我師。橫大敗。諸軍赴江。死者甚眾。凡犒軍金帛。盡為虜得。橫亡。失都統印。匿草間。獲免。或云是日中軍將劉汭臨陳先遁。故敗。汭。錡之姪也。庚辰。采石捷書聞。初。虜兵雖勝。視瓜洲江闊難渡。而采石淺狹。且朝廷方以李顯忠代。

王權統金陵之師亮意其號令未定也以此月八日九日親執旗鼓督細軍臨江而聚所掠之舟密載甲士南渡會漁人諜知其期走白顯忠及虞允文亟命舟師逆之虜舟雜以木筏又其人不習水我以戰艦乘風衝擊賊兵皆溺死亦有數百人已登南岸者允文激勵士卒殊死鬪盡殺之不然幾殆辛巳聞采石北師稍稍引去乙酉聞北師聚於淮東真揚間甲午武鉅報克鄧州外城王彥報師次長安外邑大抵諸軍時時以小捷聞而淮上益急十二月己亥朔同舍皆至政府自午至酉方出堂先是邊報稍緩宰執皆早歸一遇警急往往晚出張真父戲云欲知敵情但視堂又軍興以來陰雨連綿天氣愁沮間值晴霽必傳捷音同舍又戲云欲占凶吉請視日庚子晴鎮江諸帥報元顏亮為其下所戕亮之將敗盟也得浙匠教之航海於是大興工役造巨舟於膠西刷河北壯丁雜以金人謂之大漢軍命蘇尚書者為之帥其謀為我以大兵踰淮逼江中國必悉師來拒錢塘禁衛空虛則樓船可擣腹心腹心震駭雖抽江上援兵亦已無及然後可以得志其部分計畫皆有成說乃命張忠彥堅壁鳳翔以弊吳璘又命劉夢攻擾襄漢而亮自率精銳及簽軍號數十萬由淮東西兩道入既未能渡江則駐師維揚日望海道如約無何朝廷遣李寶

或云劉琦預謀率防海之舟先過山東將次膠西禱神祠遇順風又得謀者用其言衝虜舟舟既大而簽軍及女真不習戰懼束手敗降寶縱火焚數十艘而歸亮聞大怒暴戾益甚殺戮無常人人惴恐葛王者知其可圖也遣親信結帳下兵殺亮會亮親兵別攻泰州左右無助乃以冬至夜作亂亮驚起為攢箭所殺食罷同舍相率慶二揆楊參黃樞首揆有還白溝之語夜鏢學士院何通遠疾眩在假劉共甫時暫攝直辛丑文德殿宣麻李寶自右武大夫宣州觀察使提督海船拜靖海軍節度使充浙東西路通泰海州沿海制置使京東路招討使賞膠西之功也聖旨已降指揮巡幸視師可用十二月十日進發黃樞云今早得報十一月晦虜兵陷泰州剽剽老幼俘掠少壯極其慘酷即亮所遣親兵也或謂左右與葛王通謀故說亮遣之壬寅金國大都督府牒國朝太祖皇帝創業開基有天下迄今四十餘年其間講信修睦兵革寢息百姓安業不意正隆失德師出無名使兩國生靈皆被塗炭今奉新天子命詔已從廢殞大臣將帥方議班師赴國各宜戢兵以敦舊好須議移牒牒具如前牒宋國三省樞密院照驗大定元年十一月三十日丁未王彥報收復華州戊申大雨巽時上披氍裘乘馬出北關門宰執建王以下皆紫衫從駕至稅亭御船

進發。留司百官班辭于東倉以泥濘免拜。隨駕官宰執皆行。後省金按節。劉珙諫院梁仲敏宰屬徐度六部長貳凌景夏張運御史臺吳芾陳良祐卿監王普史浩郎官曾汪余時言薛良朋馬騏姚寬一官率兼數職。餘不書。己酉雨不止。留守相公視事於都堂。徙居於執政政府。職事官皆上謁。庚戌午後雨稍止。王彥報收復陝州。甲寅聞車駕十四日次平江。十五日歇泊。今日進發。丙辰陰聞樞密行府限五日結局。虜兵萬餘尚留和州。李顯忠禦之。辛酉雨聞車駕二十日次鎮江。未有進發之日。初虜之殘兵屯和州鷄籠山。李顯忠攻之不克。亡失兩將。虜兵緩轡徐歸。顯忠躡其後而不敢逼。久之方出境。丙寅聞赦新復州軍。紹興三十二年歲在壬午正月戊辰朔。車馬在鎮江。太史局奏未時太陽交蝕。甚於申復於酉。雨不止。無所見。守局如式。庚午晴。聞歲旦鎮江日蝕五分。又聞德音赦淮南。京西殘破州軍。壬申陰。陳宗卿置酒省中。聞車駕此月三日發鎮江。丁丑吳玘等報十二月十二日收復汝州。武鉅報十四日復嵩州。己卯武鉅報十二月九日義兵復西京。又聞王師復壽春府。其實入空城而已。虜兵至則又棄之。丙戌聞有旨班進討之師。糧運不繼。且疫癘大作也。戊子聞有旨二月六日回蹕。癸巳聞北虜遣使告即位。二

十三日聖旨差洪邁張掄克接伴使副。邁借左朝議大夫試尚書禮部侍郎。二月癸卯駕離金陵。丙午發鎮江。丁未太尉劉錡薨。乙卯五更出餘杭門五里迎御舟。丙辰丁巳戊午歇泊。假己未文武百僚詣後殿問聖體。乙丑幹辦諸軍審計司嚴致明云常歲除川陝外諸軍支春衣二十四萬餘足。今春止二十一萬餘足。蓋自去冬用師開落三萬。而隱冒不預焉。著作佐郎張震權倉部郎官云行在百司及內人月支米十萬餘石。內外諸軍歲支米四百餘萬石。三月庚子聖旨扈從及隨逐一行官吏軍兵依紹興四年扈從至平江府例。並特與轉一官資。餘人犒設一次。樞密行府官吏軍兵諸色人依此推賞。癸卯吳璘報逐金人至寶鷄。盡得關隘。樞密院編修官鄭樵卒。字愚仲。興化軍人。力學著書。不為文章。不事科舉。屢至闕下。游諸公間。二十八年講筵官王綸等薦對。特補右迪功郎。主管架閣庫御史葉義問論其過失。改監南嶽廟。給札歸抄所撰通志。三十一年夢其書來。得樞密院編修官。請修壯虜正隆官制。比附中國秩序。因求入秘書省。繙閱書籍。未幾又坐言者寢其事。至是欲進通志而病。病數日卒。年五十九。樵好為考證倫類之學。成書雖多。大抵博而寡要。平生甘枯淡樂施予。獨切切於仕進。識者以是少之。壬子北使高

許和遣良臣歸報會順浩罷相趙鼎主戰良臣請祠去久之召拜左司員外郎進檢正權吏部侍郎兀朮寇邊邀結好詔良臣與王公亮議之虜欲斥地盡江歲遺匹兩皆五十萬良臣曰被命以淮為界非江也兀朮陽諾而答書云使者許我江北矣良臣私發其封大驚明日携入詰兀朮背約兀朮辭窮為取璽紙易書和議自此始定俄坐臺劾與近習暱出知廬州徙池州復敷文閣待制進直學士秦檜任事久士大夫異已者徙相望良臣遺檜書曰天有雷霆尚隨之以雨露欲勝天乎願為子孫計毋貽後悔也檜死御批召陳誠之及良臣等四人良臣先至遂拜參知政事紹興二十五年十二月也良臣既驟當大任銳意更庶事稍裁諸將回易之弊發三省堂厨官賁瑜罪流之人頗畏懾然學術空疎舉措多輕佻內外譴誚不三月罷為資政殿學士知紹興府內侍鄧友護殯官干擾府縣良臣撻其盜伐禁地林木械送行在詔貸死決配人頗服其果未幾提舉洞霄宮起知宣州徙潭州洪州所至治盜甚刻洪州之政尤暴率卒年六十九五月丁未梁仲敏蔡寺丞沈子平相訪蔡乃君謨曾孫陳亞嘗有蔡襄無口便成衰之戲自是子孫立名多連口字惟子平從之壬子五更至漏舍平明入麗正門宰執親王使相待從臺諫兩省官禮官並詣射殿立班

辰時八刻皇帝自御幄出再拜升殿奠醑顯仁皇后神御前沾灑久之在廷泫然神御出麗正門皇帝奉辭宰執至禮官皆騎導赴景靈宮文武百官奉迎於宮門騎導官步導赴後殿未時八刻再立班行奉安禮左僕射陳康伯充禮儀使是日天氣甚涼初出麗正門細仗布列鼓吹振作衆馬驚跳戶部汪侍郎方跨鞍而墜腰臂皆損癸丑歇泊假欽宗小祥前輔臣至權侍郎以上赴几筵殿行奠醑禮以明日樞密院罷散天申節道場故前期入奠甲寅有旨張浚專一措置兩淮事務兼節制淮東西建康鎮江府池州軍馬丙辰張子蓋李寶連報海州圍解虜兵敗走國信使副以十六日到虹縣金國接伴使工部侍郎龐副使秘書少監已先在遣人致問云不須傳衙便請過界丁巳天申節故事當拜表賀有旨免百官晨赴明慶寺望闕立班再拜賜香口宣再拜訖又再拜首相以謝表授中使回奏頃之再進班滿散祝聖壽道場臺吏引予立香案側謂之監香甲子未後御筆手詔朕以不德躬履艱難荷天地祖宗垂佑之休獲安大位三十有六年憂勞萬幾宵旰靡怠屬時多故未能雍容釋負退養壽康今邊鄙粗寧可遂如志而皇子瑋毓德允成神器有託朕心庶幾焉可立為皇太子仍改名初用煒字或謂近唐昭宗名有旨別擬定所司擇日

備禮冊命其宮室官屬儀物制度等疾速討論典故以聞詔自內出外廷不知也。自去歲修秦檜舊府貴近密語人云。上欲行唐堯故事。尋以邊事而止。今春工役甚急。外議籍籍。四月末。新除侍御史呂廣問以陳康伯姻嫌。改除禮侍康伯因求去。上始露倦勤之意。云朕年老多病。皇子將四十。可付社稷。徑欲行內禪禮。他日近臣奏云。事當有漸。無令四方或致驚駭。上曰。朕未思此也。故先下立儲之詔。而意指已見。或謂此即初製傳位詔云。六月戊辰。殿院張真父上殿。擊朱揆。仍納副本。倖自拜相。即地震。且立朝專務迎合。中外雜然譏訕。臺諫欲論列而上。春至厚。非有大惡。勢不能去。五月間。倖聞內禪有定議。語其子端厚。端厚遽令幹辦府以狀申太府寺。去其本國學生。去秋誤作白身奏補承事郎。乞批料錢曆為證。會有密告臺諫者。以謂國學生與白身初不繫入官利害。蓋臆料將來覃恩國學職事及得解人或可免省。而倖在相位可主此議。又懼人之知也。故不於吏禮部而言之太府。但欲取官文書照使爾。彈文專指此事。并面奏大。臣懷姦覲幸。非常不可恕。上聞之變色。辛未。御營宿衛使楊存中保明。扈衛統制將佐使臣軍兵等四萬三百五十二人。四月六月奉旨諸班直等三百三十四人并諸軍扈衛官兵二萬九千七百三十二人。各特與轉

一官資出戍暴露井扈衛官兵二萬九千七百三十二人。各特與轉兩官資。今日報臺見之。癸酉。侍從臺諫禮官就御史臺集議。故宗室子倖并妻加封事。初朝士有以子倖恩數白宰相者。宰相難之。既而冒昧進呈。上遽曰。他日誠難處置。今了却甚善。尋有旨。皇太子所生父子倖。贈秀玉追謚安僖。中書舍人唐文若既書黃疑其未安。急白宰相。別取旨。改稱皇太子本生之親。俄又收回制書而降旨云。故宗室子倖并妻。合行加封。今禮官侍從臺諫檢照典故討論。聞奏於是諸公倣濮王之議。請極其官爵。使後無以加。且服屬雖絕。當從權冠以皇兄二字。庶免著姓。惟徐敷立。汪聖錫。呂仁甫。堅欲稱宗室。予與辯論久之。乃肯書奏。是日奉旨。子倖贈太師中書令。追封秀玉。謚安僖。元係左朝奉大夫。克祿閣修撰。妻加封秀玉夫人。而制中加皇兄二字。甲戌。皇太子賜字元永。宰臣率百官詣文德殿拜表。賀立儲。翰林學士洪遵等十六人以皇太子正位東宮。告廟了畢。同班上殿。稱賀。實欲致戀軒之意。上曰。朕在位失德甚多。更賴卿等掩覆。真父仲誠同對。促罷。朱揆上曰。即有處分卿等皆公論也。乙亥。旬假。宣麻。朱倖罷右僕射。時內禪日逼。宰執請止降告。上不欲廢故事。故就假日。殿院張真父之具藁也。察官周元特獨未知。一日云。某昨夜夢朱相袞服還。

鄉且以棺自隨此何祥也真父驚異具言之者曰衰服者白身也端厚正白身事故為此舉其以棺自隨殆能終保觀文乎暨告廷果除觀文殿學士提舉在外官觀臺諫交章乞褫職皆不報昨日劉共甫當直以常為倖薦在假規免丙子五更至待漏院平明正殿設仗上坐雨稍止禁衛閣門三衙文武百官以次起居宰執上殿奏事訖駕興班退頃之復追班序立殿門上閣門官南向宣詔曰皇太子可即皇帝位朕稱太上皇帝退處德壽宮皇后稱太上皇后云云百官拜舞訖入詣殿下立班皇太子即位流涕久之側立拱手群臣拜舞稱賀內侍固請坐御榻不許禮畢宰執奏事皇帝亦立聽班退雨復作太上皇帝自祥曦殿乘道遠車幸德壽宮儀衛及從駕臣寮並如常制百司就幕次起居太上皇后相繼出陳德召司業云某在宗寺見玉牒載紹興初今上皇帝初入宮宰執贊太上聖德真堯舜用心太上曰堯舜之事甚不難則脫蹤之意蓋素定於當日矣丁丑大雨駕詣德壽宮繳扇皆止宮門外百官班迎泥凇沒膝不能成列初定議注皇帝率百官朝謁太上既而詔百官免入俄有旨從駕臣僚亦不入但就宮中行家人禮昨日上欲從太上過宮大臣議不同而止侍從官赴都堂議赦初定太學止免職事人文解御批在籍皆免非故事也

中興備覽議征伐孟子曰征之為言正也各欲正己也馬用戰蓋在己者不正則無以得天下之心作天下之氣臣願陛下強勉修德先正其見夫左右前後之人犯顏拂意惟善是言則陛下聞見益廣聖德日新左右前後之人孫志順肯求悅聖心則陛下過失益著聖德日衰天下從違自此分矣况兩宮遠狩四方困窮所責望于陛下者如何耶惟陛下戒之謹之無謂其細故而忽也斥去邪佞登崇善良以福四海以隆社稷議用兵用兵之道貴在專一心有所主不憂中制則雖敗而能勝雖弱而能強自古見於行事此類非一也若夫號令改易進退猶豫則未戰而先敗矣臣曩為富平之舉不能擇將而任之紛紛然徒事約束是以終至於敗今日之事朝廷當以為戒也議駕御將帥論者謂人主之御將當結之以恩待之以禮此固是也然臣竊以為服將帥之心莫若一循理道而加以至誠則何事不濟若一有不歸於正彼雖遜順伏從而其心已窺測懷望矣唐自肅宗之後藩鎮跋扈終至於亡豈非有以啓其心者乎議親近之人臣竊惟人主之尊譬如北辰不動於上而眾星拱之是以聖人治天下必謹選左右親近賢良以輔成其德嗚呼見君者非齋戒沐浴恭獻善言則不敢輕進焉若使小人或得以肆其市井之說是為漬尊矣

至於詢之芻蕘以問利害茲又無不可者議君子小人朋黨之論起而君子小人之名紛然交作莫知其孰是孰非自古患之矣夫志在天下國家此君子也志在一身此小人也然而託君子之言行小人之志其事甚微其情難辨人主當留意焉然自昔帝王之用心惡聞人之有過而喜人之改過其小人也特使之退聽自省而已幸而改過猶復用之於外焉若必曰某為君子某為小人一二別之又未知真能辨之否也如人以不善之名則人必報之以至惡之實朋黨交傾端自此始然則人主宜如何哉知之于心待之以權使上下內外各當其分真為小人者方且化而遷矣使其言者之誤而吾未嘗以此名加之人心豈不悅服乎議姑息儒者拘於古義惟知薄賦省用可以得天下之心而不知排大難除大患權一時之宜救四海之急其用心非不本於仁取之於民有不得已者且愛民而姑息之一旦有急不能保護使之父子流離生事委棄安在其為仁也况兩官未歸中原俟望天下之心所以責望於我者至重乎雖然兵興之久生民憔悴益甚矣陛下勉之寸陰是惜至誠有為以惠天下臣請以死効力焉議間諜自古用兵莫先於料敵而間諜之發本以為之輔耳故能察見虛實分別情偽莫有失者若夫今日聞某處聚兵即發兵

以應之明日又聞某處聚糧即又發兵而應之是惑於聞聽而常制命於敵矣臣願異時邊警有急當先料之於心無或輕出號令則失誤鮮矣議指揮諸軍號令出於一則令嚴而事有所濟使臣行事於外而朝廷異論於內則上下觀望鮮能成事也議固結人心臣嘗謂方天下無事之時君臣上下之分其勢足以相維雖人君不能修治其身及繩正其左右以失天下之心其為禍也尚遲乃若艱難多故敵情不測人心易怨君人者儻有差失禍亂不旋踵而作矣大勢一去不可復合無以微而忽之幸也議名器論者曰方今名器猥濫宜有以更張而貴重之此意誠是也然臣嘗觀漢高祖有天下起於匹夫分土列爵以收天下之豪俊而卒成帝業其後光武中興布衣之交並列三公小大功臣以千百計豈有他哉定天下之大難救百姓之塗炭非有以振動鼓作之未易得其死力也夫賞幸予私徇情納賄此可為名器之濫至於激厲將士摠攬英豪寧失之過方今逆豫盜有中原神人共憤彼方且假吾爵祿以欺詐其下在我者當如何耶議分別邪正方今士大夫之賢者莫不欲主張清議發明正道以為萬世人臣之戒誠以有天下國家要在天得人以維持之故忠義大節不可不明苟使持祿保身隨時俯仰者得行其志則馮道

之徒復見於後日矣豈人主之利耶然臣嘗謂天下自有要道隨時舉措則盡得天下之心而致治不難也且園城之役明受之變當時從邦昌而為侍從徇苗傳而有所施為其罪固大厥後乃繼踵作相持握化權果何以勸忠義示風俗耶若夫論者必欲正其罪而暴白之則又失中矣何者士大夫之不能死節義則無所不為而死者人之所甚難未可人人而責之也今正名其罪則有過者無以自新非其本心者無以自見附偽之人知其無所逃於天地之間將與我為死敵矣非國家之善計也臣願陛下戒忠義之不可不勸思有以發揚而榮顯其身至於不幸而得罪於名教則亦優容涵覆特遠而去之不委以心腹之任則取天下定國家明教化之術盡於此矣 議彈擊 自昔為臺諫之臣者通曉古今深明治道其弛張獻替莫不以天下國家為念嘗考其所言輕重緩急皆有條理於姦人之有才者則必力排而極詆之惟恐其言之不切論之不詳非有心於甚惡之也謂不如是則彼之姦計得以行彼之才術得以施將為天下國家之害矣至於人材平下政事差失姑擊之使退未嘗以陰昧之事切切然深指之使其人幸而悔悟尚可以為朝廷之用不為無補也乃若宗工巨儒功在社稷則初不以末節細故而輕議其失蓋欲使四夷八蠻知有

是人斯足以增朝廷之氣近世進用非人皆失此意臣獨願陛下掩人之過成人之美則孰不歸心而樂為吾用也 議任人 臣竊惟自昔人君於內外侍從之臣間有深知其所為者往往自為我之聰明才智足以制御而役使之而不知事有緩急理有不虞臧伏竊發為國家大患由辨之不早去之不速也可不戒哉 議撫恤侍衛之人 臣嘗為人君高拱於一堂之上其於天下百姓內外士卒安能徧撫而盡恤之哉則亦推至誠之心自近以及遠而已今有人於此無故而陵侮毀辱其類則天下識與不識莫不深惡之者此無他人情本於一故也是故推至誠之道以待遇左右爪牙之士則孰不悅服而歸心一人傳之十人傳之百以千以萬莫不皆然臣願陛下稽祖宗之法撫恤衛士問其疾苦知其嫁娶時其飲食教其事藝使適其中不必拘以常制則天下之凡為將士者莫不知所自勉而樂為陛下用矣 議堂吏 或者謂堂吏員冗而俸給優厚宜有以裁制之臣竊以為養之不厚無以責其廉但當督責戒約使不為過可矣彼其間固有棄父母生事而從陛下者汰之澄之其在異日乎 議軍器 臣嘗謂軍器之積數不厭多或者乃以大軍器用足備不為之計而不知虛養兵卒所費更廣緩急闕乏非旬月可辦也 議民兵 臣竊謂

往歲巡社之舉。無益於禦寇祗以召亂。而況東南之人。其不可為兵也明矣。一發其端。為害甚大。不可不審。議諸州兵官。臣竊惟方今人材之豪傑者。悉皆從軍郡邑。兵官未易得人。當徐徐改易。庶不至駭人耳目也。議宣政人才。臣嘗謂宣政之間。內外用事之臣。固有得罪于天下。或專事應奉。或興造土木。或留意花石。或搜求玩好。此類甚多。天下之人。憤怨久矣。今若復用之於內。彼雖循理自戒。天下猶疑之。疑之則謗生。謗生則禍起。曷若祿之於外。以養其身乎。惟陛下圖之。其在當時。而能奉法守公者。此固宜褒崇而激勸之也。議刑罰。臣竊見前此為帥者。皆為嚴刑重罰。可以整治軍旅。不察其情。不原其心。故罰不當罪。多怨怒而深恨之者。方平居無事時。雖上下相制。不敢犯分。然而人心已離矣。一旦有警。誰與效命。不測之變。殆將由是而生焉。庸將鮮知此理。嗚呼。人心不可輕失。豈特為將者然哉。為人上者。儻不思所以正心修身。事每謹微。一失其心。不可追悔也。議大勢。當今大患。不在逆豫。而在醜虜。此天下之所共知也。虜既衰敗。豫何能為。故今日之獻說者。莫不以得地莫能守。遇虜莫能敵。為朝廷之所甚憂。然而金人譬之虎也。擒虎者。必使其力困氣弱。心亂技窮。而後虎可得焉。夫使金人安然蠶食數十州之地。未嘗有東顧

西備之憂。而曰坐待其弊。其說蓋已踈矣。況豫之乘暇。因間以整其人。而又生一敵乎。故夫量力度勢。止嚮而爭天下。不可一日而忘之。此天下之大勢也。臣故備論之。議將帥之情。臣嘗謂握重兵被隆委者。其過失嘗聞於天下。而事不任責言。可惑眾者。未有不獲美名。此何故耶。人情惡人之在己上。而患己之不能有所成立。凡有血氣者皆然也。是以紛紛之論。莫可究正。豈獨將帥哉。然則人主何從而辨之。要當學古之道。酌今之情。苟於吾心。未見有可用之實。勿輕以畀付也。知之而後用之。用之而勿疑。天下之事。可不勞而定矣。議假竊威權。堂上遠於百里。堂下遠於千里。門庭遠於萬里。人君端拱九重之內。而欲徧知天下之事。盡察天下之情。不亦甚難乎。臣嘗謂為君有要道。在夫善任人而已。不然則一己之聰明。何以勝千萬人之思慮。是故自古聖賢之君。必選端正忠實之士。以充左右侍從之列。廣問博詢。而姦邪壅蔽之計不行。昔人之喻謂虎有以狐自隨者。以狐終不能竊弄其威也。然狐隨虎而行。則百獸為之辟易。而其威信焉。曷若遠而去之之為愈乎。在昔人君之於臣下。固有知其操術之不正。施為之犯義者。謂我之聰明。足以制而御之。曾不知其耳目所不及者。所損多矣。可不戒哉。議道理。甚矣明皇之於祿山。愛寵而親信。

之也。雖妃子之貴為之執爵以飲之，豈非欲得其誠心而托其捍禦疆場耶？然其終也不能免其不叛，至使六飛蒙塵，四海肇亂，其故何哉？御之不以心也。嗚呼！人主以一身而臨億兆衆庶之上，所持以承祖宗之業，建百世之基者，惟理道所在耳。得之則治，失之則亂。儻惟此之行，如圭玉之純，略無瑕汚，如日月之明，曾無掩蔽，王道不難成也。夫今日之為將帥者，忠義之質出于所性，蓋天實生之以佐陛下中興，且久與書生從處於古，是非得失之計，亦耳聞而心熟之。臣願陛下待之以正禮，遇之以直道，不復少有間隙，俾之或得而窺伺，則君臣享福，垂美無窮，豈不為千載之盛事乎？

議讒間 自古陷害忠良者，莫不先譽其美，稱其善，使人主初不寘疑。然後乘間伺隙，其說得以行焉。或託之星象，或假之圖讖，或借助於獻言之人，浸淫日久，而人主之心移矣。昔陳平捐萬金而間楚之君臣，范增卒以不用而死，讒間之為人害如此。臣願陛下每於斯事，謹聽而熟察之。

議進取 臣聞諸論者曰：今借使復中原，擒劉豫，得其地而不能守，金人之來而不能破，一豫復起矣。是動不若靜之為安也。曾不知虜肆不道，豫為叛逆，天下疾憤甚矣。王師一振，勢當百倍，虜復聚兵，又安能為我敵乎？況其黨隙既開，怨讎交起，棄亡可翹足而待也。不然，為吾之計者，是終

無適而可矣。且將束手而待盡乎？論太原 昔虜人犯順之初，以五萬之衆環太原而攻之，久而不下，乃築長圍而去，留數千銳卒於此，休兵息馬於沙漠之地。天下始困弊矣。嗚呼！竭天下事力，不能解太原之難，而終至於京城覆亡，宗廟播越，我之失計亦何多邪？夫毒獸之害人，未至死亡者，在手當斷其手，在足當斷其足，所損固大而生尚存也。向使朝廷重兵于澤潞，大饗士卒，厚給廩餼，據險而守之，不急急於太原之救，虜未易度太行也。故夫天下之患，莫大乎一有變故而不能定議，審處自取，顛覆且國家自創業之初，江淮兩蜀率皆未下，秦晉之地尚多賊，有祖宗以次征討，志意未嘗少屈，胷中有所處故耳。今天下蒙祖宗積累休德，功無難成者，獨恐夫說說之議，惑聽疑心，一有驚急之報，上下自紛亂耳。臣願陛下以此為鑑焉。

議朋友 臣嘗謂人之大倫，朋友居一於朋友而薄之，則父子君臣之間從可知矣。後世乃有賣友欺友而得寵於君上者，風俗何為而純厚耶？議大軍屯駐 臣嘗觀楚漢交兵之際，漢駐兵於穀澗之間，則楚不敢越境而西。蓋大軍在前，雖在他岐捷徑，不能踰越也。故太原未平，則粘罕之兵不復濟河，亦以此耳。今之論者多以前後空闕，虜出他道為憂，曾不議其糧食所自來，師徒所自歸，彼其上下之心安得無恐？

而不至離散也。不然環千里之地盡以兵守之。然後人心可安。議兵至此不亦踈謬乎。議出使。近者日親遠者日疎。人之情也。況於君臣之間乎。古語謂一日不朝其間容戈其所由來遠矣。故息壤之盟終不能定其君之志。自古立事者為難也。臣遭遇陛下特達之知。每去行闕動以歲月計。亦仰恃陛下神聖聰明必能洞察而力主之耳。至於沒潤之言。捍闔之論。疑似之間。機數之起。願陛下加察焉。議均節。天生民而立之。君俾司牧之。非特使之奉養其私而已也。自古聖賢之君莫不恭儉節用。損己益人。凡以順天意享天心耳。且農夫終歲勤動計其十畝之耕輸公上而有餘者所得不過一金耳。我乃捐之以市不急之用棄之以徇無名之費豈不重違物理乎。乃若排去大難勸賞有功宗廟之供官吏之俸將士之養此則宜從優厚而不容但已者也。臣仰惟陛下至誠恭儉追古聖賢而臣竊聞文書刀劔之求尚容有賜予過制者焉。夫多難之時人情易怨力戰效命者所得如此而伺間投好者顧亦如彼。即解體矣。衛懿公好鶴鶴有乘軒者將戰而國人皆曰使鶴。臣謂非獨名器為然也。錫賚之間亦所當謹也。議練兵。士有好為大言者以兵家勝負在將不在兵苟將得其人驅市人而戰可也。將非其人兵精器利曾何補於用乎。嗚呼為此說

者蓋亦不思之甚矣。夫趙歇秦初歛之兵號稱二十萬能戰者無幾也。韓信率新勝之人以破之。借使金人舉河北山東之眾無驍騎利甲無堅弓良矢雖董之以鉅罕輔之以偽太子臣知其易為敵矣。故有精練之卒然後可以議嚴訓之方有訓練之兵然後可以議兵器之利有堅利之器然後可以議破敵之計。知此數者庶乎可以論兵矣。彼空空然謂可驅市人而戰者豈不誤國惑聽乎。議任事。昔漢高祖得陳平於亡虜其信任不疑至捐萬金而輕以予之。苟書生儒士與聞其計得不痛惜而力止之乎。臣謂非特漢祖為難能也。陳平受之而不辭為尤難焉。使今之為臣者蒙陛下以萬金付與殆將自失而走矣。夫拯天下之難救生民之急非君臣同德一心慨然有高天下之氣事未易立也。平本無王佐之才特其英姿雄畧差出一時耳。尚能輔漢成四百年之業況以陛下之明聖仰承祖宗積世休德苟為臣下者不惜其身不顧其私不慮其禍任天下之責而為之庶乎或有濟矣。如臣愚陋終恐不足以副使令之萬一。議親民之官。設官分職本以為民故。聖人視勤勞之大小命品秩之高下非有功於民不在選也。監司守令於民最親者也。今皆號為冗官及瓜而去則乞憐於人莫有顧者。彼文辭巧麗親舊推薦期歲之間可致清要茲豈不倒

置已甚乎。嗚呼！求天下之士於言語文采之間，臣知其無以得真賢矣。況夫推薦者之不公耶？後世坐廟堂秉樞要而於安危之機、治亂之理、百姓之情、財用之源、甲兵之事，瞢然不曉者，無他用之無其道也。繼自今以往，可不知所戒哉？議堅忍立事。臣嘗觀漢祖因思歸之兵，與項籍力戰，滎陽成，臯間大小七十餘戰，身因兵潰者數矣。然則良平之計謀，曾不預其敗乎？是不然也。夫高祖東嚮以爭天下，良實啓之。平多奇畫，高祖數賴之以免。至於不幸而用兵未利，則亦上下同心，姑為善後之圖耳。何至紛紛然自為離間乎？此其所以能終有天下也。燕退樂毅，秦用孟明，可以為鑑。而況不為樂毅，益明者耶？議忠臣良臣。臣竊聞真宗皇帝嘗著忠臣良臣及權臣姦臣論，臣以為忠類權良類姦，何以言之？忠則任事，任事則多怨。豈不幾於擅權乎？良則委曲，委曲則不暴，豈不幾於為姦乎？然則人主於此如之何而辨之哉？則亦視其志之所存而已矣。彼其志在天下國家，切切然以身任內外之責，是之謂忠。志在納君於善，將順其美，是之謂良。乃若營私立黨，蔽欺君上，苟利於身，以死力行，則為權矣。逢君之惡，事每阿循，反覆變詐，陰肆譏間，則為姦矣。臣故別白而具論之。議皇極之道。甚矣古之人君喜人為善而樂人之改過也。臣於洪範見之，其言

曰：凡厥庶民，有猷有為，汝則念之；不協于極，不罹于咎，皇則受之，而康而色。曰：予攸好德，汝則錫之福。時人斯其惟皇之極。夫不協于極而受之，自言好德而信之，聖人所以待下者，豈不忠且恕乎？或謂好德者，許之自言，容有欺詐。聖人信而弗疑，得無害於治乎？是不然。聖人修身以化人，推誠以待人。積之歲月，雖欺詐者且將還而為善。況於不忍為此，以負其教誨者耶？蘇軾之論，以謂唐武后之無道也，非獨進人無所留難，士之自薦皆得盡其才。其後開元之間，幾致刑措，皆武后所收也。德宗好察而多忌，士無賢愚，例不得進。國空無人，以致奉天之禍。故陸贄有言：武后以易得人，陛下以精失士。至哉斯言也。臣故併陳之。議進退人材。人主之於人材，試之州縣，養之館閣，見其可用，則用之；不必以未盡深知為嫌。見其可去，則去之。見其可罪，則罪之；不必恥其用之於前而遽廢之於後也。要當如天地之於萬物，一切待以無心。吾之為此，凡以為民而已。非有一毫私意於其間也。雖然，人才之遇合，又有大患焉。或因一言之契，意雖無長才，奇畧寢以柄用；或因一事之拂意，雖有賢德，美行寢以踈遠。此無他，蓋其喜怒好惡之氣，未能平之以歸于道。故投隙乘間者，得以行其姦也。夫如是，則日復一日，賢者益退，不肖者益進。終至於國家喪亡，天下大亂。初以

為得計而其失計莫大於此矣。初以為我之威福得以肆行而其後威福不行莫大於此矣。故古之賢君莫不正身平氣以求合於聖人之道。其用意終在天下百姓不敢私其一己是以於進退人材之際無不當理焉。臣願陛下力行之。議聽言之難。古語有之。築舍道旁三年不成。蓋言之者多則聽之者惑。自然之理也。帝王之道聽雖欲廣斷惟務獨故成湯之伐桀百姓以為我后不恤我衆舍我猶事而割正夏主其議者伊尹而已。武王之伐紂雖夷齊之賢亦叩馬而諫風雷暴作皆有疑心主其議者太公而已。今日之事以中國而攘夷狄以君而討臣以有道而誅無道雖遲速大小所舉不同終在夫力為之而已矣。往歲江湖皆旱獨二浙豐稔故可以給軍須請百姓向使浙亦被災則大事已去惜乎議者之不思及此也。機不可失賊不可縱時不再來昔人論之詳矣。臣去國踰旬憂慮倍積惟恃陛下主之於內故不憚說諛之言冒瀆天聽所冀曲賜照臨。議祿廩之制先王制祿以代其耕用意深矣。蓋倉廩實而知禮節衣食足而知榮辱非特百姓為然今使委質而事人者仰無以事父母俯無以育妻子且不多寡之數厚薄之差以激勸勤勞獎厲才智何以風動在位使之自立于無過之地耶。夫合天下之衆而君之欲舉得其歡心亦在夫本

人情而為之制耳。過制則紀綱亂不及則人心離。是二者其失均也。嗚呼仕宦不為利祿計者鮮矣。僮夷齊之操人人為之則天下之士盡為山林之遊。人主安得而器使之乎。至於左右近習又宜深察而熟究者。彼其生長富貴奉養有素日用不給何以責廉將自營其私耶。則有浸漁細民之嫌而怨謗日益以生。將受遺於人耶。則有請求納賄之罪而國體日益以損。臣謂不若省其負優其俸然後責之以善則其從之也輕。茲有天下國家之大計人主不可忽也。議行師臣嘗讀易至謙之上六曰鳴謙利用行師征邑國至復之上六曰迷復凶有災責用行師終有大敗以其國君凶。至于十年不克征。夫鳴謙而虛已則善日益以進過日益以聞四海歸仁上天眷祐故用師為得之若乃迷復而不反則遂非恣欲寢失天下之心矣。故終有大敗。臣讀易至此始知兵家大要特在夫人君之一身今陛下修己進德孜孜不倦上可以通於天下可以格於人臣知夫大功可立中興可期矣。更願陛下勉之謹之悔咎自省無使驕怠之意少生於中。帝王之治豈難成哉。張魏公奏議論車駕進止利害。臣昨日幸侍天光獲聞聖訓退而思之惟是車駕進止一事利害至大。臣區區中懷所見未知當否敢以剖露。惟陛下深思而詳擇焉。臣竊惟天下之事不唱則不起。

不為則不成。自古賢聖之君平定禍亂，未有謙退遠處而能躋天下於太平之域者。惟太公避狄，句踐報吳二事，士大夫多以為口實，不知與今事勢萬萬不同。夫祖宗二百年積累之基業，付在陛下。不幸而虜人陵之，叛臣據之，陛下不得已而養銳待時，以俟天定，猶之可也。至於事有可為之理，時有可與之勢，思前慮後，猶豫不決，豈不重失人心乎？臣請以恭諭善奕者先固基本，次定算數，臨以大勢，使之左右枝梧之不暇。然後我勝可必，彼敗可分。今四海生民之心，孰不思戀王室者？虜叛相結，脅之以威，雖有智勇，無由展竭。三歲之間，賴陛下一再進撫，士氣從之，而稍振。民心因之而稍回。正當示之形勢，庶幾乎激忠起懦，而三四大帥者，亦不敢懷偷安苟且之心。夫天下者，陛下之天下也。陛下不自致力，孰肯履危險，忘寢食，孜孜焉惟恢復是望，而愚忠不移者乎？臣意謂今日之事，存亡安危，所自以分。陛下六御僅還，則有職解體，內外離心。日復一日，終以削弱。異時復欲下巡幸詔書，誰為深信而不疑者？何則？彼知朝廷姑以此為避地之計，實無意於圖回天下故也。陛下若斷自宸衷，有進無退，車塵一動，上可以格天心，下可以順民望，虜叛之勢，寢以蹙縮。大功自是而立，大業自是而成。論者不過曰：萬一秋冬有警，車駕難於遠避。夫軍旅同心，將士用命，

扼淮而戰，破敵有餘。況陛下身臨大江，氣當百倍。苟士不效力，人有離心，陛下雖過自為計，將容足於何地乎？又不過曰：當秋而進，士有戰心，及春而還，絕彼窺伺。此特可舒一時之急，應倉卒之警。年年為之人皆習熟，謂我不競，當有怨望，難乎其立國矣。又不過曰：賊占上流，順舟而下，變故立生，所不可測。夫棄漢我有也，賊舟何自而來乎？虜叛事力有餘，果能陵犯水陸，偕行自上而濟，陛下身處臨安，去建康無數舍之遠也。處之其安否乎？三者利害，有同白黑。矧惟陛下遭兩宮之大恥，負四海之重責，天意人心，兩皆屬望有為而去。成天下猶矜憐而歸心陛下也。不為而坐待其盡為禍，可勝言耶？夫為將帥之策者，恐臣導陛下而前，督其進取，曾不知事有機，會時有利。此士馬不能遽益也。賊勢不能立破也。要宜剛大其志氣，恢洪其度量，以拯救天下百姓為心。仰無愧於天，俯無忤於人。度事而為審時而動，先謀自治利而誘之，致而破之，何難而不可濟哉？惟陛下斷以恢復為事，則任恢復之人以退守為事，則任退守之人，使各引其類，求其黨，一意施為。為陛下畢盡死力，庶乎不至於操持兩端，擇利自謀也。臣又竊譬之，父有痼病，其子欲以膜眩之藥治之，而或者爭止焉。為或人之謀，疑其愛已為子之謀，似乎不審。然而人各有心，姑取諛悅，捨此適彼，所不慙。

馬謂子為不盡忠乎其父豈不過謬哉。今臣侍陛下以還。為臣之謀無所任責。誠亦得計矣。為陛下國家之計。恐有所未至。是以披心腹。露肝膽。反復一二言之。而不知其當否。惟陛下裁赦。貼黃。臣輒盡已見。仰塵聖覽。區區臆說。未知當否。願陛下因此闕暇。更加聖思。齋戒沐浴。以告于宗廟。謀之鬼神。此大事也。臣豈敢固執一己之見。異日惟陛下詳教。而曲諭焉。庶幾君臣之間。得盡心腹。不貽萬世之論。論車駕進止事宜。臣昨日得呂祉私書。以建康宮室未備。意望車駕少留鎮江。庶幾事集。臣反復計之。容有可議。今天氣尚熱。恢圖是時。大駕僅有定居。人情自當振作。有司措置錢糧。亦須以時而辦。臣意只欲於鎮江暫駐三兩日間。乘此晴明。便行進發。更乞聖裁。三月上奏。乞降車駕至江上指揮狀。臣契勘日近事宜。警急正當。鼓作士氣。以圖戰守。臣愚欲望聖慈。特降車駕至江上指揮。未須進發。庶幾將士聞風。各圖效命。伏乞詳酌施行。取進止。范太史集。乞車駕不出劄子。臣等今日入侍經筵。伏見皇帝陛下氣體清羸。猶未復舊。適聞來日車駕欲出臨奠。孫固緣國家見居石頭巷。往來甚遠。又方盛夏。竊恐聖躬初就康復。正當保護。未宜衝冒。昔唐太宗欲出臨高士廉之喪。長孫無忌伏馬前涕涕切諫。太宗乃還。并檢天聖故事。宰臣張知自參。

知政事。魯宗道薨。毀兩宮。亦不並出臨奠。伏望聖慈。更與執政大臣詳酌。特罷臨幸。取進止。四月十三日侍講。臣司馬康。臣范祖禹侍讀。臣趙彥若劄子。貼黃。臣等三人。今在寶錄院。更不及與范百祿。吳安詩同共聞奏。乞車駕所過不毀民屋。劄子。四月十二日。臣伏見祖宗時執政大臣第宅。散居諸處。或遇亡歿。車駕臨奠。儀衛簡省。雖入隘巷。亦不拆毀民屋。自熙寧初。置東西八位大臣所居。近在闕門。雖有臨奠。更不經歷街巷。昨來曹佺之喪。二聖臨幸。有司毀拆屋舍。大過。居民不無失所。雖百姓多侵街差屋。毀之不敢有怨。然因車駕經過。比之他處。獨被煩擾。恐非陛下仁聖子育萬民之意也。今孫固亡歿。已在外第。街道甚遠。竊慮車駕臨奠。有司毀拆更多。臣愚欲乞先降指揮。除大段窄隘處。量加撤去外。無令過當。拆屋。庶使聖駕所過。小民知恩。取進止。張守昆陵集。車駕經由常州。乞上殿劄子。臣恭聞警蹕時。巡經由常州。臣乍逢天陛。竊願一瞻穆穆之光。少慰犬馬戀軒之誠。伏望睿慈。許臣候御舟艤泊上殿一次。取進止。

永樂大典卷之一萬二千九百三十

一送

宋

高宗一百七十二

宋員興宗西陲筆略虜初命將窺蜀虜初發難叛盟賊亮謂衆曰誰能
為我攻蜀者我貴之或曰惟某將可即引某將封拜令專兵西鄉某將曰
蜀城險人和引日以取弗可取也亮以為沮衆殺之并誅其家二百餘口
翌日再命合喜字堇合喜恐懼受命邊民驚徙狀虜將初議窺邊遣
民懲艾建炎初禍難之殷復議驚徙成鳳間有女婦嬰幼危墜淵谷者有
掠郡縣財物主名不立者階州城下武興節制司中有強盜浸浸自北谷
不介而出去武興數里今不剪恐為後憂上司命以一旅勦之無何城中
遂定秦州賊將驕傲致敗秦州初未下招討司命劉統領海取之或
曰大夫促行賊素傲以驕今驟以兵取之以湯沃雪耳先是偽守及將領
皆流湏荒宴不輟索狎官軍弗之虞也將兵將軍乞求開者尤甚每酒酣
自歌曰金亦有銀亦有我曹為樂宜耐久未幾城壞其旗幟有飾而未縫
綴者後盡俘至軍前去官軍因糧於虜官軍既下秦隴凡山西阨塞

積粟。詹聚甚衆。謀者云：虜意不在小，本舉是餉軍，且求窺蜀也。及屢敗秦州及臈家城，得糧約十八萬石，浮休約五千石，小石寨約二萬石，威姬寨約二萬石，水落約一萬石，其他千百石，往往而在前後，共三十五萬石。故官軍所至沛然，殆非人力也。西安輕卒被害，過秦數百里，西安寨者亦險阨之衝也。虜令賊將辛杲者守焉，辛亦驍武，本蕃族，數為邊患。東路都統司姚仲命其將將麾下攻之，因謂曰：賊屢敗，兵輕且驍，易與耳。汝攻之，慎勿逗遛。其將乃去寨十里所駐兵，分百餘卒傍虜營立柵，其夜虜劫之餘兵殲焉。議者謂將分輕兵于外，既非餌兵，又置之必死之地，所謂無故棄人於虎口者也。或曰：其將素亦有聲，豈亦名過實者歟？其將姓傳虜，出令遣間諜，虜既與官軍相持，時遣盜走軍為諜，然竟弗達也。予訪邊將云：虜近令如有以南事告者，人賞銀一則，二十五兩為則，獲正軍一級，博軍一級，賞以錢，人參拾阡，雖以此激衆，未有為之用者也。秦州徙城北山，距秦州數十里外，皆平川，所謂秦原者是也。承平時，四城周遭望之，巍巍一都會，邑屋甚壯，既陷虜之久，餘民居止千一，虜遂徙城北山，若一堡然。北山即隗囂故宮，杜少陵所謂秦州山北寺，故跡隗囂宮，乃其地也。然山最徑險，虜既城其上，若控以兵，則秦隴亦未易窺也。劉海適掩不備，

得之，所謂先人奪人，迅雷不及掩耳者歟。鄭宗招下臨洮，然勇而無謀，鄭宗者亦西人為副將，與馬仲希聯戍岷宕間。上司令勢旗勝招臨洮守將，偽守趙鈴轄者稍知義理，悉蕃漢情。宗初至城下，張旗勝大呼曰：虜政亂，天意回矣。鈴轄何不下與諸將共取富貴？今臨洮兵少糧少，鈴轄執迷不返，悔無及也。趙即率吏民夜開門拜道左，及官軍下筆，宗亦在中。諸吏方受降，列飲城外。宗請先入籍兵仗，封府庫，以待諸將會虜援騎大至。宗聞之，跨鞍不甲而馳，舞稍自衛。虜喧咽，宗急爭門不聽出，或飛矢貫脇，宗即死。至今洮岷諸公共惜之，以為勇而無謀者也。賊將楊鎮國兇狡，賊將楊鎮國者廢其名，亦為洮大將。洮兵素弱，楊常飼良馬數十甲，而伏諸壁，及官軍入洮，諸將問鎮國安在，曰：夜已出去矣。至今往來熙蘭求為邊患，而竟不能也。熙蘭蕃族，為虜用。官軍未得洮河，如熙蘭等處蕃族部落村奔等，多為之用，或為虜人鄉導，或為虜人輦重。官軍所介往，往群聚嘻笑，戎狄畏服大種，蓋其天性也。及河隴既下，部落村奔大震，夷語謂酋豪為敦，又為村奔，敦者村奔之反音，村奔者其義為一村所奔走耳。劉海治平之役，戰最力。十二月二十五日，治平之役，統領官劉海踏白小溪嶺，勢矛直前，先士卒，有千戶溫狄哥者，狄哥一名發察，字董賊。

驍將也。自林外橫出擊海。槍注雙鑿甲葉。墜者三馬。左右騎皆驚。顧辟易。海伏馬鬣。以槍貫賊洞。冒壁馬。海救左右曰。速取其首以來。賊睜視。猶手前者三。牆立不動。漢騎欲前取之。賊注射兩騎皆斃。因折矛于膝。瞋目受誅。次日漢軍因堵進。虜以故敗去。斬級可計者凡二百有四。傷死者無筭。馬海字朝宗。山東人。兗州紹興初。為馬軍副將。名字堙微。金冠折合。字董犯山西諸營。欲遣探騎。主將吳公曰。若劉海者。沉壯可遣也。即以海將騎三百前道。覘索至石壁寨。在鳳翔管下三十五里。忽與虜遇。虜軍三千餘。伐鼓大譟。飛塵漲天。海率騎士殊死戰。殺虜幾殲。一騎西馳告捷。主將曰。五鄉所遣騎。乃探騎耳。豈人人關張乎。海以遊騎三百而屠賊三千。何從得此。頃之。俘馘輜重。至者盈度。即日命海為達州刺史。秦鳳路都監。云傳軍子利害。初。上司許西民勇鷙者。能出力詣軍。縣官為給復賞。皆如律。因命曰。義軍亦曰。傳軍。眾推曰。小夫子既得旗幟。或能牽制敵人。聞虜勢亦恃軍力也。然西民陷虜之久。必欲鄉義。河右郡縣往往往財物。橫見掠奪。千里蕭條。遂無舍煙。此皆傳軍之為也。上司見為要束耳。諸將議取河州。先破熙援兵。正月晦。官軍議取河州。統領官忠逢蕃兵總領李進。鈴轄榮某。張某。來知寨皆會。或曰。我倚河州。而賊兵單弱。以強制弱。何

憂不克。一將曰。不可。吾聞虜軍盡在熙。官軍若直擣河勢。必來援。吾表裏受制。此危道也。不若引兵而西。潛據險路。虜將忿兵伺其不意。可一戰以擒也。熙兵若破。則河自下。眾曰。善。即伏兵長浴口。一名閭家峽。正月十九日。已而虜遣燕大將小郎君者。提正軍千五百。從軍亦如之。徑至浴口。惠逢令羸卒數十騎誘之。約曰。旗動乃發。虜兵薄羸騎。傍徨旗動。伏兵大奮。會天風起。人馬不辨。李進為兵在旁山上。若聞空中聲云。蕃兵亂。蕃兵亂。進令左右下山。用平弩旁射。虜大亂。鈴轄榮某手殺賊數十。賊望風奔靡。遂大敗。死者無筭。擒活兵三百五十。解招討司。二月二十一日。處置訖。治平之役。先發探騎。遂破虜。初。官軍欲攻治平。諸將曰。吾眾徐行。則不為功。疾行。則不知虜之眾寡。不若使數百騎行前。伺虜之怠。乃可擊也。即命將官李庠將驍騎三百。名曰探馬。日中騎前數十里。虜兵忽合呼聲。隱也。庠愕。令一騎逸至軍所言狀。諸將失色。或曰。今若出軍救之。亦無及矣。不若勿救。統領官劉海奮曰。不可。探騎雖少。皆吾人也。不救。則吾已戰者盡殲。未戰者益沮。救不可後也。即以數百騎突前。諸將隨之。既與虜遇。遂破之。官軍疑虜援兵。遂去治平。官軍既攻治平。敗虜眾。虜謀欲遁。或有說之曰。南軍知吾眾遁。即追擊我。使我立盡。奈何。不若火城寨。為疑。

軍如此走未晚也。因大火城柵散朗如晝。官軍以為援軍大至。亦引去數
十百里。虜因遂遁。識者至今共惜此舉也。官軍巧於取秦。予訪邊人
長老皆云。官軍最拙於戰。治平巧於取秦。此言有理者。九月十九日。武階
騎兵統領劉左武海被檄。即引兵星夜以出。二十三日。傳秦州城虜不虞
南軍之至也。至近城數里。乃覺之。有數十騎躍出海曰。是來欲爭利。諺所
長必知戰者。即列卒屠之。明日。海與副將賈士元。王中正。計曰。秦城險而
堅。未易攻也。今城守似怠。當攻以火。煙甚則蔽物。賊雖有耳目。何施耶。是
天以賊賜我也。遂積藁縱火。煙上蔽城。水寨破。秦州外小城海登焉。夜中
偽守蕭濟開門以降。先是虜軍戍秦者。正卒三千。前二日。就傍郡打糧。弱
者守室。壯者未返。遂至於敗云。李進勇悍。與士卒同甘苦。間亦微巧。
蕃軍統領李進。在洮河間。或間出遇虜數十騎。顧曰。汝還識是人否。是所
謂茶李三者也。令驍騎四人突前直刺進。進刃三人。挾一人以返。進所至
與士卒下列同甘苦。故人樂為用。然出軍多避就。不肯為軍鋒之冠。將士
多譏之。進為人長行日二百里不殆。邊人號為鐵腳鷄云。馬仲希庸謬
遂失熙鞏。馬仲希者。宕昌屯駐將也。為人妄庸。丁巳冬。都統司命仲希
進兵取熙州。仲希得檄。即氣索不得已。進營熙州城外十數里。或為虜將

謀曰。吾知仲希妄人耳。且暗兵事。此易撓也。即遣間宣言曰。北軍今夕當
大至。眾共劫營。南兵之來。眾寡何似。北軍其能敵乎。仲希聞之。昏時拔營
遁去。初熙州父老聞官軍至。有欲率眾歸附者。心大喜。及翌日。仲希去皆
大笑。仲希既去。熙傍遑無所適。聞諸將將下鞏。乃引兵來會。時鄭宗李進
榮某等已誘虜將龍虎。在龍虎上將軍名滿蔡馬也方議拜降。城下龍虎
者。故虜大將黑煞子也。一名黑風以父死事。虜主貴而壻之。今以兵守鞏。
龍虎自度力屈不支。使人來言曰。我降諸將。諸將好受我降。當以酒殺相
饋。何甲也。願盡釋鎧仗。我出與公列飲城外。仲希諸人許諾。李進不肯曰。
虜誠偽未可知。且吾遣人候城中。城中夾道積錢。安知不吾詐也。吾不願
飲。龍虎出。諸將長揖環坐。進窺裏甲以待。少選。虜援騎四至。龍虎欲起。據
鞍。蘭州歸明將王宏曰。事急矣。何不遂取此虜。鈴轄榮某從後斫之。不殊。
宏繼刺之。騎士張玘斷其首。坐者皆鳥獸散。獨鄭宗死。城下久之。宣司以
仲希再失二郡機會。梟首以令諸軍。傳軍為僧徒所誘致沒。武都安
化有土豪李六者。以氣雄一方。統制李選姪請旗榜使司。卒鄉民強有力
者四百餘人俱。時時剽掠為事。一日眾至德順野。次有僧舍。曹居李即稱
兵以入。一僧曰。大夫何遽至耳。胡不入室。求爾戈矛。取爾財帛。吾僧徒拱

手託命而已一錢不占也。雖然大風苦寒請出為大夫具醪飲如何。李曰如此大善。僧出。眾因弛甲環坐。間有熟寢者。虜兵忽薄寺。眾遂驚。乃鄉者僧徒招之也。曹建有季父風。官軍將攻治平。有曹建者。故知鳳州武姪也。武凡戰。即持刀斫陣。戰皆疾力。甚為西人所紀。建長有武風。以故軍中亦以曹大刀名之。武階副將鄭庠。既為虜騎所薄。諸將皆前援之。劉海謂建曰。子生平持大刀。威壯自喜。今日乃效弱夫。怯懾陣後。何鄙也。建曰。大夫責建。良是今日。建得死所矣。即大呼而出。有虜驍騎突來。建揮刀人馬折而為二。虜陣遂靡。建因奮前。誅殺過當。先是武舊戰。冉家彎。令諸子羣從執異械以從。其名有狼牙棒。馬刺刀。峯鐵鞭。所過如山之摧。以故屢成功云。河州士民望風歸義。官軍既薄河州。偽守及同知望風降下。先是虜寧河寨官者。幽燕人。堅為虜守。無下意。百姓聞之。排戶裂其尸。劈首詣官軍。初諸將議河州富厚。久陷逆地。人心去留未定。及薄城下。民爭開門。香車花輿踵道。皆曰。我曹華人也。衣冠禮樂之舊。前日被髮左衽。實非我願。今親父臨我。我敢不認耶。有再拜流涕者。大槩山西編戶。願為王民類如此。虜潰將招西蕃部落為軍。熙州虜正軍。不過二千餘人。閭家峽之戰。為官軍破滅者。殆半。虜將小郎君。退牧潰卒。併招西蕃部落。

予為正兵。有賊將李節。使揚鎮國趙鈴轄者。皆故敗虜。聚兵與之合。大略不過萬人。邊將常曰。虜兵易與。十不敵部落一二。山西既下。則部落行且離貳。可以見虜無能為也。平河之功。士以賞薄致怨。河州既下。諸將方籍庫藏。編什物。人人眩功。不相能者甚眾。或言當暫賞軍。主將令人支錢十餘。時食物貴。踴炊餅一直錢數十。諸兵得賜。擲地大詬曰。我曹捐軀下河州。今性命之賤。乃不直一炊餅也。及退也。殺馬關。兵間有道亡者。悲夫。兵法所謂軍無賞。士不往。軍無財。士不來。為將者。奈何其不思也。河民留諸將同守城。扞虜諸將共議出屯。河州在山西。承平時最富貴。有原曰。萬頃餘糧。棲畝民蔽野。距河數十里。曰寧河。又有金坑。近亦廢不治。諸將既下河。方議隱括庫財。或傳熙州虜軍大至。眾欲控城固守。主將惠逢曰。不可。虜眾我寡。河又初附。未易守也。有如城中翻覆。外救不至。則將奈何。即募眾欲出州。民父老咸障馬曰。鈴轄何為去我。鈴轄但坐府中。我曹出力血戰。必有當也。何患兵少。惠諭眾曰。我今去此。求援兵于外。非直去汝。將遂以援汝也。汝曹一心努力守城耳。即留都監王姓者及博軍願留者數十百人。因出屯殺馬關。一名通會。是日李進亦乘馬過市。呼曰。河州父老有識李進者乎。我乃進也。初不挾一縷以入。今不挾一文以出。因

鞭馬亦去。居數日，虜圍河。河民相率登城固守云。河民懲寧河歸順之禍，相與死守。虜再取寧河，寨名快意，戮寨民歸義者，流血丹路。已而兵再傳河州諸將已去，城中百姓計曰：前日寧河之民南歸者，虜盡屠膾，我腕效之，即一寧河也。豈有全理？不如告諭城中父兄相與守死，猶有千一得活。即籍定戶口，男子升城，女子供饋。郡有木浮圖，高數十百尺，衆因撤木為礮械。虜悉力來攻，木絕，少選，壓賊有糜潰者。居三日，賊退屯白塔寺，距城五七里云。榮鈐轄先登，并諸將追虜曲折。虜自熙引軍欲援河，官軍既過於閭家峽，軍交有榮鈐轄者，乘駿馬揮鐵鞭掠陣所向，風靡衆隨之。賊遂潰，虜主至今畏之。相戒曰：無輕犯榮鐵鞭也。榮等既逐賊，有數十百騎遁去，追騎襲至，托子橋橋以截木為之，久故將敗。有一賊將自殿後立橋右，瞪目直視追者，曰：會來此決死。追騎乃不敢逼，賊將自護渡餘衆。衆渡已，乃乘馬徐行去。後人有獲虜問曰：孰為汝將？小郎君者曰：鄉也。身青服而馬朱甲者是也。微伺之，即前立橋右，自殿後而護渡者也。河州民伍為虜屠戮。惠逢既令兵官王姓者留河州，率義士民伍乘城距守。閏二月辛未，初六，虜劫熙蘭之兵，薄城下，彌望蔽野，兵械甚設。會義軍有射中虜將曰官人者，虜少却。癸酉，賊將小郎君等揚聲曰：河州能為南

人死守甚壯，今我留此，萬一漢軍乘虛入熙，則熙又為人有也。不如引兵歸援熙耳。乃率兵徑去，城上士卒伺知之，交口相賀。城守益怠。他甲以坐是夜，人人困卧，城隙漏上，賊驅鐵騎擣城，斯須壞。州民尚有不知賊至者。翌日，賊驅父老嬰孺數萬屠之，遷壯者數千隸軍。先是上司命惠逢李進等會蕃漢兵援河州，逢以兵徒單寡，不能支虜。乞師者已再頃之，都統司差將領郭師偉將騎七百為逢聲援。師偉未至河州，再潰逢屯通會進屯臨洮。逢遣人謂曰：虜今再至，是無河州決也。吾曹罪在不測，不如併力以往，猶獲免也。進曰：賊兵愈前，近萬人，我以危兵綴之，必取辱。逢信之，因休士卒進。即星夜趨河州。後二日，逢聞之，掩面泣下，曰：李進誤我進至河州，聞州亦已潰，虜焚蕩餘城趾而已。悲夫！河民鄉義而終不獲全，諸人相忌媚之過也。聞昔陸贄之論邊事曰：若一旦羣帥異心，則祗足生事，舊寇雖平，新患亦起，不可不察也。四邊用兵，祥徵甚多。關外四州比歲屢荒，歲在辛巳，夏秋大熟，九月軍興，糧糗及約而辦，武都隴邦也。麋碁子造至四萬石，他物輸軍稱是。嘉陵江水平日，春秋之極，其流淺，跣可涉也。冬十月，乃運舟，艫軸相銜以上。若大濤方漲，馬悲夫！賊金之禍，吾國烈矣。神久憤嫉於此，豈惟人心有知？江神亦有知耶？許同諸公方議奏此事得之矣。

虜人詐為旗榜誘博軍。陝西博軍既逃出，逃入時利剽劫，故邊民有棄田里耕鑿為之者相接也。洮岷間常有博軍數族徑出，或遇賊騎卒千百，從間道出，眾注視以為虜大集，議擊之。一賊突前軟語曰：「汝曹無乃博軍耶？」曰：「然。」曰：「汝無擊我，我曹亦博軍也。」汝脫不信，盍來視。汝使司旗榜乎？眾乃就視旗榜，曰：「真是也。」因益玩狎。須臾塵揚，虜騎張翼擊博軍，得脫者十一二。又武都白崖楊氏子亦領眾七百為虜所詐，無遺餘焉。鞏民思歸義。二月，招討司一日攻鞏，有父老數十輩，種具米麵，輦以餉軍。至軍門，曰：「我曹聞大軍來，幸甚過望。小民自度無所用力，願犒從者。」大將納其饋，積餉物軍門如丘。後數日，城危拔矣。官軍忽引去。父老狼狽，相謂曰：「虜今覺我餉南軍，我無類矣。」不如作計求活也。即殺官軍，後兵輦重者數級，并焚饋物而去。鞏州城中虛實，大軍再攻鞏，砲礮幾百餘座，衝梯如之。城中亦回砲不息，砲怒或引一人以下。諸將問之，進云：「城中危甚，勢且不敵。」太尉旦暮決力當得之矣。又問：「有蓄兵幾何？」蓋軍幾何，曰：「城中甲軍不過千五百，食糧軍亦不過千五百，輦重者亦不過千百餘，皆編戶也。頃之又有繼來降者一人，問之其辭皆合。」四州山寨天設之險，虜以冬十月寒盟，邊民擾擾，宣司出令，使沿邊州郡細民據險相保，就其險阨之

所有若天設。如武州西有花石峽，右有楊家崖，咸有董家山，洛有仇池，城鳳有馬嶺堡。秋防興，趙二原而仇池尤高，峙聳拔其形如削，瓜上有良田百畝，可駐萬馬，飛泉凡九十有一源。大旱可濟也。山徑仰空如擲線，雖悍夫千百攻之，巧無所施。此山鬱鬱意有異人託之，東老謂萬古仇池穴，潛通小有天，豈殆然耶？張忠彥兄弟投偽事，賊將副都統張忠彥本陝西兵官，故常事曲端端者，邊人所謂威武將軍者也。忠彥兄忠孚尤兇狡，禍賊紹興初，是年建炎四年，任陝西路統制，見同列進用素缺，望會金寇婁宿犯邊，將至熙，忠孚即挾叛志。忠彥與相諧附，即進曰：「我欲驅州吏北投州，吏肯從我乎？」忠孚曰：「兵權在我，欲驅州吏驅大蟲耳。」獨餘李三行行未知人意也。原本缺三字汝可呼之入李三者，乃統領官李彥奇也，為人尤惡戾，喜鬪，以故忠孚畏之。至是因呼果來，忠孚即閉閤，杖劍于膝，脅之曰：「汝欲不齒吾劍，不若聽吾令，不然今不得活。」彥奇曰：「統制所以命之，忠孚曰：人生共覓富貴，豈問南北乎？當與汝徑去。」李亦唯唯，從命。後數日，遂驅官吏陷逆地。同時有年二者，亦熙河大將端部曲也。既陷虜，復歸西夏，當權用事，以謀叛為夏人誅死。年常項金冠，邊將畏之，謂之金冠卒。二云：賊亮虐用西民，初賊亮虐用西民，民不自聊，常曰：「何日南兵來活我耶？」凡

民歲輸錢曰門役錢時遣使下郡縣曰天使天使所至立馬戶外索銀曰立馬銀督事胥吏劇若星火曰了事人有司公事大吏即上下其手士民饋送曰搗盞錢又令陝西括馬數十萬分配河東北百姓戶養之怨殆入骨其政目類如此雖欲無亡不可也白常不肯仕虜紹興十五年偽書來徵在南將士王四小巢白常三人俱在遣中王曾任荆南總管巢亦位將領兩人至賊所即為効力獨常不肯仕曰丈夫死而死耳不能為反覆士每自樹頭衙曰前熙河安撫使白某虜撒海見之不悅也後欲強官之竟託疾以免常有治產在德順熙河女真守將惡之大詈曰孰有既臣我家而尚宋官乎枷禁數十日不為屈又欲蕩其產撒海憐而釋之今尚無恙云王宏歸順事宏歸順起於王去惡見別章蘭州王宏者本名家子父膺虜即怏怏思部署徒黨密欲從順會坐事虜帥鎖以地牢凡十餘年釋之軍興宏即劫蕃族以歸上司命為熙河路統領官摧殺之後宏奮曰吾赤手歸明驟官將領不以死報國非夫也即突出部署擊賊坐倚注飛矢如蠅宏不動虜援騎敗去宏叔父某亦建炎初名將也李世輔知同州欲劫賊皇弟即君南歸王亦起兵會之事覺誅死其人黑而長邊將謂之鐵幡竿西人諺曰誰為飛虎將無若鐵幡竿為王發也王明清揮

麈尾錄明清前年風底百僚夏日訪尤丈延之語明清云中興以來省中文字亦可引證但建炎己酉之冬高宗東狩四明登舶涉嶮至次年庚戌三月回次越州數月之間翠華駐幸之所排日不可稽考奈何明清即應之曰自昔以來大臣各有日錄以書是日君臣奏對之語當時呂元直為左僕射范覺民為參知政事張全真為簽書樞密院皆從上浮于海早晚密衛于舟中者樞密都承旨辛道宗兄弟也各人必有家乘存焉今呂范二家皆居台州全真鄉里常州若行下數家取索目錄參照則瞭然不遺時刻矣延之云甚善便當理會繼而延之病矣不知曾及施行否去秋赴官吳陵舟過茂苑訪一親舊觀其所藏書目得己酉年李方叔正民代言詞掖從行航海所記頗備明清所緝後錄取王穎彥錢穆記錄其間於此亦有相犯者姑悉存之所恨尤先生不及見之耳其目云中書舍人李正民乘桴記曰建炎己酉秋七月車駕在金陵初一日下詔奉隆祐太后六宮外泊六曹百司皆之南昌命簽書樞密院事滕康資政殿學士劉卬同知從衛三省樞密院治常程有格法細務及從官郎吏皆分其半從行八月十六日隆祐登舟百司辭於內東門閤八月一日內出御筆以固守建康或趨鄂岳右駐吳越集百官議于都堂群臣皆以鄂岳道遠恐饋餉難繼

又慮車駕一動即江北群盜必乘虛以窺吳越則二浙非我有乃決吳越之行十三日制以呂頤浩為左僕射杜充為右僕射繼又命杜充以江淮宣撫使留守建康府松江諸將並聽節制二十四日從官以下先行二十六日車駕離建康府九月八日行在平江府十一日以翰林學士張守齋書樞密院周望為兩浙宣撫使留平江府初命周望為江南荆湖宣撫使駐兵鄂州以控上流以頤浩不可離行在乃改命焉十月二日從官以下先發初五日車駕離平江府十三日行在越州入居府廨百司分寓十一月二十日知杭州康允之遣人押到歸朝官某人云自壽陽來報金人數道並入已自采石濟江以未得杜充周望奏報朝廷大駭集從官議欲移蹕江上親督諸將為迎敵之計宰相侍從同對於便坐或謂且遣兵將或謂宜募敢戰士以行宰相呂頤浩又自請行議未決退詣都堂午間得周望奏狀錄到杜充書虜騎至和州信已召王玘移師南渡杜充親督師詣采石防守朝廷稍安從官乃請遣兵應援建康又分兵守衢州信州隘路慮胡騎自江黃間南渡或徑趨衢信以迫行在也二十一日命傅崧卿為浙東防遏使令召募土豪以備衢信得江州報胡人破黃州由鄂州渡江向興國軍洪州是日有中使自洪來云隆祐一行已於十一月初八日起

發往處州矣二十二日從官又請對慮胡騎不測馳突請以郭仲荀輕兵三千從車駕至平江府倚周望招韓世忠兵以為援仲荀方自杭來士卒老幼未至易作去計而令張俊兵以次進發既對上以張俊重兵不可留遂決議皆行退命直學士院汪藻草詔曉諭軍兵以迎敵之說乃以二十三日先發兵三千車駕以二十五日起行既至錢清堰宿頓是夜得杜充奏我師敗績又康允之奏人馬已自建康府徑路犯杭州界遂倉猝回鑾二十六日次越州城下從官對于河次亭上議趨四明呂頤浩奏欲令從官已下各從便而去上以為不可曰士大夫當知義理豈可不扈從若如此則朕所至乃同寇盜耳於是郎官以下或留越或徑歸者多矣二十七日以御史中丞范宗尹參知政事是日早駕詣都堂撫諭將士移御舟過都泗堰不克二十八日晚出門雨作自是路中連雨泥淖吏卒老幼暴露不勝其苦命兩浙轉運陳谷瑞沿路排頓用炭一千二百斤猪肉六百斤以給衛士云十二月五日車駕至四明居于府廨朝廷召集海舟甚急監察御史林之平自春中遣詣福建召募海船至是相繼而至朝廷甚喜十一日親從班直百餘人因宰執早朝至行宮門外邀宰相問以欲乘海舟何往頤浩喻以利害乃退上命辛永宗勒中軍盡捕諸班直囚之十三日

誅其首者十有餘人。並降隸諸軍。以侍御史趙鼎為御史中丞。十四日。臺諫請對。上喻以不得已之意。又探報虜人已入杭州。劉俊引兵出戰。不勝。康允之走保赭山。詔六曹百司官吏並於明越溫台從便居住。於是左右司御營使司參議官皆留十五日。大雨。群臣欲朝。至殿門。有旨放散。惟宰執入對。既退。車駕遂登舟。至定海。宰執從行。十六日。從官以次行。吏部侍郎蘇望之以疾辭。不至。詔給寬假。給事中汪藻乞陸行。以從。十八日。聞有使人至。命范宗尹趙鼎復回明州。以脩執既至。乃前所遣報信使臣而已。十九日。車駕至昌國縣。二十四日。遣權戶部員外郎李承造往台州刷錢帛。二十五日。早得越州李鄴奏云。虜人已入宜興。下寨。別令人馬自諸暨趨嵎縣。徑入明州。乃議移舟之溫台。是日。范宗尹趙鼎回。至行在。二十六日。啓行。自是連日南風。舟行雖穩。而日僅行數十里云。二十九日。歲除。庚戌正月一日。大風。碇海中。二日。北風稍勁。晚泊台州港口。三日。早至漳安鎮。駐舟。知台州晁公為與李承造皆來。上幸祥符寺。從官迎拜於道左。是日。得餘姚把隘官陳彥報人馬至縣迎擊。乃退。又得韓世忠奏。見在青龍鎮就糧。欲俟散人之歸。為擊計。初。命世忠駐兵鎮江。控扼。後聞胡人自米石濟師。上命追世忠赴行在。又欲令移軍常州。呂頤浩請御筆召之上。曰。

朕與世忠約堅守。今聞乃來。於是遣中使賁詔世忠聞采石失守。已離鎮江府。登海舟矣。至得奏。上優詔荅之。四日。象山縣報人馬至明州。張俊為戰守備。明州西城外民居盡焚之矣。然其意亦欲來赴行在也。晚得康允之奏。繳到杜克書。已在真州。與劉位聚兵。為邀擊計。徐州趙立以師三千來援。建康守陳邦光及戶部尚書李統皆降于虜。六日。張俊奏云。二十九日。正月初二日。凡敵殺傷相當。又得二十八日奏。及差人賁到。二級。上命辛企宗以兵一千赴明。策應。又出手詔趣杜克趙立劉位激勵使戰。以為後圖。皆親書示宰執。乃遣之。而辛企宗不行。七日。周望奏。常州有紅抹額賊眾犯外城。知州事周杞守子城。以拒賊。赤心隊劉晏出戰。敗之。又言知秀州程俱率官吏棄城。保華亭縣。又探建康人馬皆焚糧草。收金銀。稍渡江。壯去。自稱李成人。馬云。八日。張思正奏云。張俊出兵擊退虜騎。思正與劉洪道李質分兵追躡。九日。張俊已自台州趨行在。意恐金人小劔濟師而來。力不能拒。爾前此屢奏求海舟。朝廷報以方聚集。遣行。欲其且留明州。既得此奏。甚以為憂。又慮李鄴已迎降虜人。以越為巢穴。其經營未已也。十日。郭仲荀責授汝州團練副使。廣州安置。以擅離越州及妄支散錢帛。又夜過行在不乞朝見等罪也。十二日。勝康遣使臣秦隆祐一行。已到。

虔州前此得信州探報云十七日到吉州又云二十一日有人馬至吉州東岸知州楊潤棄城走朝廷深慮胡人追躡然本謀南昌之行意謂虜人未必侵犯雖離建康日得密旨今緩急取太后聖旨便宜以行後至平江議者乃云自斬黃渡江陸行二百餘里可抵南昌朝廷始以為憂遂命劉光世自淮南移軍于江州以為南昌屏蔽既至而軍中月費十三萬緡知州事權邦彥以用度不足告於朝廷命洪州三省密院應副至十一月中權邦彥乃奏言得東平府故吏卒報其父已身亡遂解官持服朝廷雖遽命起復而邦彥已離郡去及胡騎渡江光世乃言初謂斬黃間賊寇遣兵迎擊既知其為金人遂回軍隆祐以初八日行胡騎以十四日到城下於是知州王子獻以下皆走胡騎入犯撫州執知州事王仲山以其子權知州事令根括境內金銀走洪州送納虜怒其少撫州四縣不及洪州一縣乃知信州陳玘探報也十三日劉洪道奏金人再犯境上遣兵拒之及陳彥在餘姚屢獲首級及稱李鄴並無關報文字然台州探報越州並於散把隘人兵及管待虜人與之飲燕又命父老僧道赴杭州知其必迎降矣十四日張俊自台州來執胡人一名至行在戮之知邵武軍張翥奏有光澤縣弓手同胡人一騎至軍稱有大軍千餘人繼至已行斬首於是福建

諸州皆震恐知福州林通奏乞遣兵防守又自言老病不任事乃命集英殿修撰程邁代之十五日胡人再犯餘姚朝廷欲遣張公裕以海舟數千載兵抵錢塘江下燒焚胡人所集舟船衆以公裕素不知兵又慮海舟反為胡人所得皆以為不可十六日雷雨發聲十七日劉洪道人兵以十三日一便水陸並進直至城下洪道與張思正皆引兵出天童山先是李質已擅趨台州朝廷方見三官令還四明已無及矣又聞南昌胡騎入潭州而洪撫建昌之間稍稍引去建昌通判晁公邁中先因出城招集民兵以軍事付訓練官承信郎蔡延世凡八日而回延世拒而不納十八日移舟離章安鎮始張俊既移軍朝廷議分遣其將領率兵應援明州上不欲遣乃止謂此時駐蹕之後資以彈壓蓋行在諸軍並皆精甲全裝稍整齊爾又批令劉洪道等皆退避其鋒然議者皆慮明既失守則海道可虞而行在必不敢安也十九日晚雷雨又作二十日泊青澳門二十一日泊温州港口二十二日余被旨奉使江湖問安隆祐官自後不復記錄聞行在已駐温州矣已上李所記云明清又聞是歲越州郡守李鄴既以城降通判曾志罵賊不屈而死全家被害獨乳婢抱一嬰兒獲免有宣教郎知餘姚縣李頴士者募鄉兵數千列其旗幟以捍拒之賊既不知其地勢又不測

兵之多寡為之小却彷徨不敢進者一晝夜繇是大駕得以自定海登舟航海事平詔特贈忠直秘閣命其弟愬子密以官穎士遷兩官擢通判州事時又有宋輝者為大漕治事秀州之華亭縣聞龍艘已涉巨浸即運米十萬石以數大舶轉海訪尋六飛所向至章安鎮而與御舟遇百司正闕續食賴此遂濟多事之際若二人輝與穎士者亦可謂奇績而忠之忠節皆恨世人未多知之穎士字茂實福州人登進士第紹興中為刑部郎中輝字元實敏求之孫後為秘閣修撰知臨安府忠南豐先生之孫密即所逃嬰兒也嘗知南安軍輝塵後錄宣和中燕諸王于禁中高宗以困於酒倦甚小憫惓次徽宗忽詢康王何往呼左右告以故徽宗幸其所視之甫入即返驚愕默然內侍請于上上云適揭簾之次但見金龍大餘蜿蜒榻上不欲呼之所以亟出歎息久之云此天命也繇是異待焉趙士幾老云高宗嘗語呂頤浩云朕在宮中每天下奏案至莫不熟閱再三求其生路有至夜分卿可以此意喻刑寺官凡於治獄切當留心勿草草頤浩再拜贊即以上旨喻之姜女禮虔恭云曹功顯勛語明清云昨從徽宗北狩至燕山逃歸顯仁令奏高宗曰上為康王再使虜中欲就鞍時二后洎宮人送至廳前有小婢招兒者見四金甲人狀貌雄偉各執方劍擁衛上體

婢指示眾雖不見然莫不畏肅后即悟曰我事四聖香火甚謹必其陰助今陷虜中愈當虔事自後夜深必四十拜止更令奏上宜嚴崇奉以答景貺高宗後駐蹕臨安即詔於西湖建觀象設以祀甚為壯麗又云后未知上即位嘗用象戲局子棗以黃羅書康王字貼於將上焚香禱曰今三十子俱擲於局若康王字入九宮者必得天位一擲其將子果入九宮他子皆不近后以手加額喜甚即具奏徽廟大喜復謂后曰瑞符昭應異常可無慮矣王廷秀字穎彥四明人靖康初以李泰發薦為臺屬高宗即位擢登言路著書號閱世錄其中一條載明受之變甚備蓋其所目擊是時宰輔如朱呂二張俱有記錄矜夸復辟之功悉皆不同有如聚訟不若穎彥之明白無偏今錄于左建炎己酉三月一日宣麻以朱勝非為相罷葉夢得左丞王淵自平江來上殿對畢除簽書樞密院既受命之次日有旨只依兩府恩例不預省事四日廷秀入對以初除察官未經上殿故也五日入起居畢復宣麻殿門即聞外變宮門已閉廷秀與察官林之平同宿留於翰林院前翰林院以臨安府使院為之久之入學士直舍李邴為內翰從官王綯孫觀都司葉份亦在少頃聞宣宰執云苗劉兵殺內侍且欲必得康履曾擇藍珪有一闕走入學士院自刎不死卧前廁聞駕御

樓軍士山呼康履走入內中步軍太尉吳湛尋捕得於小亭仰塵上擒以付苗劉即時斬首標之宣諭以內侍有過當為治之二將與轉官其下對我等若欲轉官祇用牽兩疋馬與內官何必來此已而復召侍從百官廷秀從諸公上樓見上座金漆椅子宰執從官并三衙衛士百官皆侍立左右樓下兵幾千數苗劉與數人甲冑居前出不遜語謂上不當即大位將來淵聖皇帝歸來不知何以處此語乃陳東應天上書中有之故二兇挾以脅制欲上為內禪之事宰相從百官出門下委曲喻之使退不從左右言請太后出處分於是上遣人請太后久之太后乘黑竹輿從四老官監至樓上命儀鸞司設帷幄垂簾置坐不能具止坐輿中傳旨下諭亦不肯從又肩輿至門下太后在輿中親宣諭且以上仁孝曉夕思念二聖勵兵選將欲復讎雪耻太尉等皆名家不須如此二兇抗言必欲太后輔太子聽政太后曰以太平時此事猶不易況今強敵在外太子幼小決不可行不得已當與皇帝同聽政委喻久之堅不從太后復上樓上白事於竹輿前言事無可奈何須禪位太后未允又令與百官同議自朱勝非以下皆不敢出言獨有一著緋官負進前曰陛下當從三軍之言眾甚駭之時有杭州通判章誼面折之曰如何從三軍之言其人逡巡無語上亦怪而問

其姓名自陳云朝散郎主管瀾西安撫司機宜文字時希孟上顧翰林學士李邴令草詔邴乞上御札取紙筆就椅子上寫詔以金人強橫當退避云云寫畢令持詔下宣示二兇兵退上亦徒步歸內中時已未刻百官方出見道傍卧尸枕藉皆內侍也是日凡宦者非入直在內皆為其所殺而財物盡劫取明日太后垂簾朱勝非辭疾不出太后使人宣召又命執政親往府中召致之太后復遣老官監宣喻乃出自是二兇更至朝堂道間傳呼都統太尉從以強虜兇焰可畏行者開道避之迫脅要索惟意所欲初一劄子凡十事如改元請上徙外宮之類宰執委曲調護其中有甚不可行者八日遂改元明受張浚自平江遣士人馮轡來議欲以上為元帥領兵移書痛責二兇二兇諷朝廷以尚書召張浚不從又拜韓世忠節度使除張浚秦鳳路總管使領兵歸不從復降麻建節度使知秦州遣人責麻制授二人二人械其使送平江獄又欲起兩湖新舊弓手之半赴行在廷秀入疏止之時呂頤浩張俊韓世忠劉光世張俊同議引兵問罪復辟又加康允之待制劉蒙直閣吳玠金部郎中兼提舉市舶小人鼓動乘時求差遣而得之者甚多有范仲熊者轉運判官冲之子祖禹之孫也嘗陷虜逃歸日與二兇交遊其賓客王世修張遠王鈞甫馬柔吉皆締暱五月

之事仲熊實與聞至是二兇諷顏岐薦上殿除省郎言凡臺諫章疏乞露姓名行下其意蓋欲言者懼二兇不敢斥言其罪十六日上出睿聖官以顯忠寺為之也內人六十四人有與過二兇遣人偵伺恐匿內侍故也擒到內官魯擇太后降旨貶嶺外既行一程復追回斬之亦二兇意也又欲以其親兵代禁衛守睿聖宮挾天子幸徽宣并浙東宰相曲折諭以禍福且以忠義歸之以安其反側順浩等領兵以嘉禾二十五日召百官聽詔書大意云狄人以睿聖不當即位兵禍連年今當降位為皇太弟兵馬大元帥嗣君為皇太姪皇太后臨朝聽政退避大位務在息兵在庭愕然廷秀與中司欲留班論列以臺諫唯廷秀與鄭穀二人遂不果就退睿聖宮立班久之上御坐起居罷宰執上殿奏事議論幾數刻傳宣令百官先退仍云已會得復聞上語宰執云若此傳之後世豈不貽笑哉次日早鄭穀入對且言既降位號則乘輿服御亦皆降殺豈將易赭服紫耶當夜歸亦作奏狀令吏寫亭午方畢即進入未後太后宣召同中丞對簾前宰執皆在鄭穀對乞次召廷秀太后云今日之事且因臣下有文字宰執商量且欲睿聖皇帝總領兵馬耳廷秀對曰臣不知其他但人君位號豈容降改聞之天下孰不懷疑雖前世衆亂分裂之時固未有旬日之間易二君一

朝降兩朝位號也太后乃云必是殿院不曾見諸人文字相公可同殿院往都堂看前後文字便見本末既退即隨兩府至都堂朱勝非顏岐王孝迪路允迪張浚皆在坐朱相自青囊取文字數紙次第以示最上乃特服人奉議郎宋邠書次即張俊奏言睿聖皇帝當為天下兵馬大元帥下數紙不暇詳觀其間亦有士人上書者意皆畧同廷秀語朱相云此事朝廷當有善後計但天子位號欲降於理未安廷秀既當言責不敢嘿嘿章疏言語狂直朱曰公為言官自當言責蓋章疏中有及大臣者復語諸公曰昨日之詔不可布于外必召變而張微云若以五日時事勢豈爭此名位耶張欲行詔出廷秀請少緩明日鄭穀入章引舜禪禹而親征有苗唐睿宗上畏天戒禪位太子而大事自決用其議遂寢二十五日詔書鄭穀遂遷西樞以中書舍人張守為中丞順浩等會兵剋日將至兇徒氣挫乃使王世修與宰執議天子復正往來數日四月一日辰時降旨召百官睿聖宮起居門外侍班次見宰執遣吏來問戶部尚書孫覿借金帶至班次忽有戎裝紫衫帶子也官負綴從官班問之乃是王世修方除工部侍郎賜袍帶未至先令綴班方悟假帶之繇蓋自渡江後宰執從官並繫犀帶今此異數用安反側世修王能甫之姪前此選人知鄭州滎澤縣虜兵偶不

曾到而是邑全李綱特與改官遂為苗傅幕賓午後上出百官起居畢即上馬百官捲班先行迎於內東閣外杭州太守常視事在大廳之北至是世修具袍帶明日有旨正朝以苗傅為淮西制置使劉正彥副之使其避張韓之兵別路而往又頒制賜鐵券帶礪之誓三日聞韓將前軍至臨平為二兇設伏掩殺四日夜二兇拔寨道餘杭門出轉龍山緣富陽而去明日韓將劉兵皆入以張俊簽書樞密顧浩右僕射朱勝非知洪州張浚知江州韓將遣人擒王世修鞠始謀并拘其妻子有旨令劉光世處斷晚有文字至臺申差察官就審實朝廷亦恐諸將鍛鍊非實情也是時察官唯陳戢獨員將臺吏并司獄至光世寨取王世修嘗與二兇語闕官恣橫而劉尤嫉之上自揚州奔播過浙西道吳江左右宦者以射鴨為樂至杭州日群闖游湖山世修以劄子示正彥憤然曰公甚忠義要須與公協力同去此輩俄又聞王淵為樞密愈不平苗劉乃與世修等謀先斬王淵然後殺內侍議已定初四日部分兵馬且使人語淵云臨安縣界有強盜欲出擒捕五日早令世修伏兵於城西橋下俟淵過即猝下馬斬之繼遣人圍康履家分兵捕內官凡無鬚者皆殺然後領兵伏闕請罪脅天子禪位此皆始謀實情依所招具奏明日戮之於市吳湛以輔二兇領中軍寨於宮

門前申請除宰執侍從餘人悉於中軍寨門下馬使悍卒持挺誰何至歐擊從人損壞輿轎廷秀兩章引皇城司格令并律文闕入法理會僅以章行而悍將復匿之而不出廷秀以臺中被受榜於皇城司前軍士方少戰至是湛亦戮焉并貶王元左言皆殿帥以當日坐視二兇之悖不畧誰何故也六日廷秀對疏言錢塘非可居當圖建康為暫都計上亦知此非處一章言王世修等及康允之劉蒙吳說范仲熊讀至論仲熊事上甚怪之乃曰范仲熊莫不如是對曰臣不知其他但在宣和末進用實出梁師成門下又入文字言希孟上初怒甚便欲梟者宰執言此當自有論列故廷秀章上迺貸希孟流嶺南而賞諸兩官穎彥又記高宗六龍幸海事云己酉十一月駕幸會稽覘者報虜人分兵渡江一自采石入建康一自黃州過興國軍渡采石者杜充兵要擊於中流小捷奏乞上請親征二十五日駕起會稽至錢清聞虜人十九日已渡大江二十六日駕自錢清回明州避虜十二月七日至明侍從百官皆散唯宰執從行留張俊軍于越辛企宗領中軍李質領禁衛護從士卒不滿數千泉州海船皆至廟堂即為航海計衛兵不欲行九日遂群噪欲狙擊宰執十一日以張思正兵索城中捕亂者戮其為首數人餘分隸五軍以御營使司參議官劉洪道

知明州與張汝舟兩易十六日早上自府衙出東渡門登舟十八日御舟泊定海縣二十日參政范宗尹入城探報十六日已陷杭州大肆焚戮宗尹即回從駕張俊以所領軍自越來明知越州李鄴遣兵邀虜於浙江三捷既而衆寡不敵鄴遣人賞書投拜虜人按兵入越俊兵在明乘賊先而恣掠鹵時城中人家少遂出城以清野為名環城三十里居民皆遭其焚劫或以金帛牛酒餉之幸免與紛爭則殺之有城南湯家子先毆其卒卒走。彌衆來痛擊垂死積稻穰蔽之。兵去人或救之者尚活而虜跡已集裂少刻而死二十七日虜引兵自餘姚道藍溪入黃劉車廐直抵湖塘分屯於湖中田舍二十八日俊引兵禦之小却於是虜人自城下呼請遣人來寨中議事明日俊遣姓徐人抵虜寨虜囚釋甲與語欲如越官吏投拜拒之自後相持不敢動正月二日午間西風虜兵乘之扣西門時俊與劉洪道坐城樓上遣兵掩擊擒斃二酋虜奔北墮田間或墜水勢當追而鏖敗之而俊亟令收兵要之得失畧相當僅能却之而已且張皇奏凱而策勲其後肆青文云鄞水勦絕其大半蓋謂是也其夜虜兵拔寨西去俊遣人候伺知虜人駐餘杭治攻具請於臨安之大酋益兵將復來俊托以上旨召扈從八月盡起其衆入台行甚速而李質亦以班直繼行思正千餘徙

屯江東而質思正洪道猶過從夜飯城中居民出者已十七八有士人率衆叩洪道馬首願留以禦賊洪道給曰予當數剋敵而勝若等事無慮復下令民遷城外者得取其家之什物儲峙於是舟入城者數千隻洪道擇其大者留供官屬取公使高麗兩庫金銀器皿櫟壓之而實於麓輿帑藏儲糧載之海舶而洪道所將精卒僅千人橫肆乘亂剽掠州人怨之十三夜洪道微服出城既過東岸恐人追襲乃使盡揭浮橋之版居人扶攜公絙索而渡卒復邀奪其所賣擁排遏抑墜水者數千哀號震天地城中惟崇節作院廂軍與無賴惡少僅千人以監甲伏使臣并監酒務李木者將之凡此皆欲僥倖賊不至掠取公私之物者十四日虜果復至營廣德湖舊寨前遣老弱婦女運瓦礫填塹十五夜植砲架十餘對西門十六日以數砲碎城樓守者奔散奏東南縋城而出或浮木渡江生死相半而奔起村落者與賊相遇由是遍州之境深山窮谷平時人跡不到處皆虜人搜剔叢榛如探巢取卵殺掠不可勝數既而破定海以舟絕洋劫昌國縣復欲攻象山縣至碇頭風電大作俗謂將碇海道最險處也遂回大率自正月十六日陷明州至二月三日方去其酋長請於長安之大酋大酋乃四太子云搜山檢海已畢其明州取指揮報云依揚州例故自二月初遣人四

面放火城中惟東南角數佛寺與僻巷居民偶得存虜人既去城外群小以船盜取公私錢物而村落兒頑殺人攘劫毒甚於虜州縣官逃避未遇有蔣安義張鼎者受虜人僞命蔣為安撫張為通判且授安義以兩浙運司印一紐安義遂領州事繫衙出榜自命其子知鄞縣敵不逞以攘取十二日慈溪縣令林叔豹領鄉兵入城見安義奪其印遺虜人十二人在開元寺病不前者叔豹誅之十六日通判蔣賡自象山郡官稍稍繼至洪道亦自台回至奉化縣言已受命制置浙東且椿糧料兵遂之越不知傅崧卿前此已收復也洪道留奉化縣比向日誅求益甚而所將精卒暴橫而肆邑人將璉兇悍人也前此群聚防守幸虜兵不至自以為功方肆強梁會洪道卒而有毆其黨者一夕敵引數千人圍岳林寺欲縱火而殺毆人之卒不得已取其卒杖流之乃定洪道既入城與張思正縱其麾下斂民居害藏逃遁之家偶脫死餒餓甚矣歸故址取其藏給朝夕則群卒強奪之雖焚餘椽楹藩籬可為薪者人不得有公遣數百輩持長竿大鉤撈攬河陂池井間謂之闌遺錢物輸公十不一二洪道復苛配強歛併得四萬緡獻之行朝欲蒙失守之罪三月十二日乘輿自溫航海至明時州邑已焚蕩舟由城外徑之越因言者罷洪道以向子志知明州顏彥家居四明

之海濱宜知其詳建炎己酉高宗蹙蹙于建康閔中擒苗傅劉正彥獻俘于朝檻車幾百兩先付之大理獄將盡尸諸市子裳詣對以陳云在律俱當誅死然其中婦女有願買及園掠以從者倘殺之未免無辜願賜哀矜上矍然曰卿言極是朕思慮之所不到即詔除二兇妻子之外餘皆釋放歡呼而出揮麈第三錄逆亮篡位之後偶因本朝遣使至其闕庭有畏讐者遂有輕我之心即謀大舉僉劄以壯人為兵欲以百萬南攻止得六十七萬以二十七萬侵淮東敵劉信叔亮以四十萬自隨由淮西來與王權相遇而王權之眾不能當在和州對壘權盡遣渡船過南岸與某眾誓云國家養汝輩許時政要今日以死上報眾皆唯唯兩軍堅壁不動權以二三腹心自隨手執諸軍旗號戒諭諸將云不可妄動且看虜軍有陣脚不固不肅者看吾舉逐軍旗號先舉動虜軍數重之內有紫傘往來傳呼者莫知其意虜軍先來犯陣遇大雨遂退復駐軍于舊寨無一不肅諸將遂語權云虜將如此我軍如何可戰權云諸公不可說此語今日正當報國之時宜盡死于此不可有一人異議諸將云太尉欲與諸軍死此邦將甚軍馬與國家保江却自往朝廷請罪又與諸將計筭軍馬渡江有殺渡軍馬還與國家保江却自往朝廷請罪又與諸將計筭軍馬渡江有殺

後者必為虜騎所追。合損折一軍半人馬。又要一將殿後。統制官時俊云。願為殿後。保全軍馬過江。眾服其勇。王琪是為護聖馬軍統制。亦同行云。所部軍馬乃主上親隨太尉。不可失却也。一人一騎。遂令護聖馬軍先渡。諸軍次第而濟。虜騎果下馬來襲。時俊牌手當之。幸所失不致如算之數。諸軍遂就采石。各上戰艦。以備虜人權為樞密行府。押詣朝廷。竄于海外。逆亮築臺江岸。刑白馬祭天。自執紅旗麾諸軍渡江。行至中流。為采石戰艦迎敵。時俊在舟中。令軍士以寸札弩射。虜人赴水者多。盡皆退走。亮知江岸有備。遂全軍過揚州。軍士奏愷未及登岸。虞丞相允文以參贊軍事。偶至采石。遂與王琪報捷于朝。虞自中書舍人除兵部尚書。自此遂東眷。知琪除正任觀察使。諸將在江中獲捷者。亦皆次第而遷。水軍統制盛新功多而獲賞最輕。壹鬱而死。建康采石軍士至今憐之。次年春初。明清從外舅起。即合肥道出采石。親見將士言之。直書其語。不復潤色。以文云。揮塵餘話。建炎己酉。以業夢少蘊為左丞。纔十四日。而為言者所攻。而罷其自記。奏對聖語。備列于後。一日進呈。知婺州蘇遲奏乞減年額上供羅聖訓。問祖宗額幾何。臣等對。皇祐編勅一萬匹。問今數幾何。臣等指蘇遲奏言。平羅婺羅花羅三等。共五萬八千七百九十七匹。聖訓驚曰。苦哉。民何

以堪。臣等奏。建炎敕書。諸崇寧以後。增添上供過數。非祖宗舊制。自合盡罷。今進奏乞減一半。聖訓曰。與盡依皇祐法。臣等奏。今用度視祖宗時不同。却恐減太多。用度不足。即不免再拋買。或致失信。欲且與減二萬匹。并八千有零數。臣等奏。陛下至誠卹民。可謂周盡。聖訓復云。如此好事。利益於民。一日且做得一件。一年亦有三百六十件。臣等退。御筆即從中出曰。訪聞婺州上供羅舊數。不過一萬匹。熙寧以後。積漸增添。幾至伍倍。近歲無本錢。皆出科配。久為民病。深可矜恤。今後可每年與減貳萬八千匹。并零數者。為永法。仍令本州及轉運司每年那融應副本錢。足備臣等即施行。車駕初至臨安府。霖雨不止。一日臣等奏事畢。因言州治屋宇不多。六宮居必隘窄。且東南春夏之交。多雨蒸潤。非京師比。聖訓曰。亦不覺窄。但卑濕爾。然自過江。百官六軍皆失所。朕何敢獨求安。至今寢處尚在堂外。嘗俟將士官局。各得所居。遷徙之人。稍有所歸。朕方敢遷入寢。臣等皆言。聖心如此。人情孰不感動。車駕始至臨安府。手詔郎官以上。悉皆許薦人材。蓋特恩也。一日進呈侍從官等奏狀。聖訓諭臣等曰。今次所薦人材。不比已前。當須擇其可取者。便擢用之。乃命並召赴都堂審察。翌日復命臣等曰。郎官等所薦士。不若便令登對。朕當親自延見之。早朝退。遍閱諸

處章奏未嘗聞今後進膳罷今後殿引見及晚朝前皆可引三班庶得款曲臣等奏但恐上勞聖躬若陛下不倦接見疎遠搜訪賢能天下幸甚於是再批旨行下一日初進對聖訓首言陳東歐陽徹可贈一官并與子或弟一人恩澤始罪東等出於倉猝終是以言責人朕甚悔之今方降詔使士庶皆得言事當使中外皆知此意臣等即奉詔言甚善聖訓復曰馬伸前此責去亦非罪可召還或曰聞伸已死聖訓曰不問其死但朝廷召之以示不以前責為罪之意乃問伸自何官責臣等皆曰自衛尉少卿聖訓可復召為衛尉少卿臣等奉詔而退東等於是皆贈官及與子或弟恩澤一人并詔所居優卹其家進呈湖州民王永從進錢五十萬緡佐國用臣等言戶部財用稍集亦不至甚闕聖訓曰如此即安用徒有取民之名却之或曰已納其伍萬緡矣今却之則前後異同聖訓曰既不闕用可併前已納還之仍詔今後富民不許陳獻臣等皆言聖慮及此東南之民間風當益感悅一日聖訓諭臣等言過江器械皆散亡甲所失尤多朕每躬探甲冑閱武於宮中以勵衛士乃知舊所造甲有未盡善如披膊皆用鐵臂肘幾不可引以當冑緩急如何屈伸今皆親自裁定損益與舊不同極便於施行今兩浙路諸州分造甲五千副一以新樣為之臣等皆言陛下

留意武事前所未講蓋經聖慮此前史所以稱漢宣帝器械技巧皆精其能朝退內出新樣甲一副示臣等舊轉肘鐵葉處皆易以皮屈伸無不利便他皆類此其後陳東歐陽徹俱贈祕撰各有官其二子仍賜田千頃朱子語類問趙忠獻張魏公當國魏公欲戰忠簡欲不戰忠簡以為劉豫机上肉耳然豫挾虜人以為重今且得豫遮蔽虜人我之被禍猶小若取劉豫則我獨當虜人難矣魏公不然之必欲戰二策孰是先生曰忠簡非是殺得劉豫了又却抵當虜人有何不可又云劉豫亦未便是机上肉在若以趙之才恐也當未得那机上肉在他亦未被你殺得只是胡說若真个殺得劉豫則我之勢益強虜人自畏矣何難當之有虜豺狼大羊也見威則畏見善則愈肆欺侮若自家真个曾勝劉豫殺得一兩番贏他便怕矣靖康以後自家只管怕他與之和所以愈肆欺侮若自家真个能勝劉豫他安得不懼虜禽獸耳豈可以柔服也嘗見征蒙記李成之子集從兀术征蒙國因記征蒙時事云兀术在甚處淮上二士人說之曰今韓世忠渡江遺棄糧草甚多若我急往收取資之以取江南必可得也兀术然其言遂急來淮上則空無所有蓋韓已先般輜重糧草歸而後抽軍回也彷徨淮上正未有策而糧草已竭窘不可言先已敗於劉錡錡在順昌

府拒其前進退不可遂遣使請和兀朮謂其下曰今南朝幸而欲和即大幸不然即送死耳無策可為也這下又不令知狼狽如是若知之以偏師臨之無遺類矣是時雖稍勝然高宗終畏之欲和因其使來喜甚遂遣使報之欲和兀朮大喜遂得還是兀朮不可望和自以為必死其遣使也蓋亦謾試此間耳可惜此機會所以後來也怕一向欲和又云劉信叔在順昌府一勝是時劉以孤軍在順昌兀朮來伐諸將皆欲走信叔曰不可我若走則虜人必前拒我襲在後必無遺類若幸而得至江則諸將盡扼江上責我以擅棄歸之罪亦必盡殺我決無可生之理不若堅守此城與虜人決勝負庶幾死中可以求生也某嘗說廝殺無巧妙只是死中求生兩軍相挂一邊立得脚住不退即贏矣須是死中求生方勝也遂據城與虜人戰大敗虜人兀朮由是畏怯若非騎順昌一勝兀朮亦未必便致狼狽如此之甚信叔本將家子喜讀書能詩詩極佳善寫字後來當完顏亮時已自老病緣其姪劉玘先戰敗遂至於敗個因問當初高宗若必不肯和乘國勢稍振必成功曰也未知如何蓋將驕惰不堪用個問如張韓劉岳之徒富貴已極如何責他死了宜其不可用若論數將之才則岳飛為勝然飛亦橫只是他猶欲向前廝殺先生曰便是如此有才者又有些毛

病然亦上面人不能駕馭他若撞着周世宗蕭太祖那裏怕他駕馭起肯是名將緣上之舉措無以服其心所謂得罪於巨室者是夜因論為政不得罪於巨室語及此又問劉光世本無能然却軍心向他其裨將亦多有可用者先生云他本將家子云云張魏公撫師淮上督劉光世進軍是時虜人正大舉入寇光世恐懼遂背後嚮趙忠簡公是時趙鼎為相折彥質為樞密折助之請樞密府遂命劉光世退軍魏公聞知大怒遂趕回劉光世出榜約束云如一人一馬渡江者皆斬光世遂不敢渡江便回淮上樞府一面令退軍而宣撫令進軍淮上然終怯怯魏公既還朝遂力言光世巽懦不堪用罷之而命呂安老社董其軍及呂安為瓊等所殺降劉豫魏公由是得罪而趙忠簡復相趙既相遂復舉劉光世為將便是事都算成私意魏公已自罷得劉光世好了雖呂安老敗事然後舉能者而任之亦足矣何必湏光世哉此皆趙之私意以某觀之必竟魏公去得光世是而趙所為非豈有虜人方入你却欲掉了去一邊令進軍一邊令退軍如何作事云云又言諸將驕橫張與韓較與高宗密故二人得全岳飛較疎高宗又忌之遂為秦所誅而韓世忠破膽矣只有韓世忠在大儀鎮等殺得虜人一陣好高宗初遣魏良臣往虜中講和令韓世忠退師渡江韓聞

魏將至。知其欲講和。遂留之云。某方在此措置得畧好。正抵當得虜人住。大功垂成。而主乃令追還。何也。魏云。主上方與大金講和。以息兩國之民。恐邊將生事。敗盟。故召公還。慎勿違上意。韓再三嘆息。以為可惜。又云。既上意如此。只得抽軍歸耳。遂命士卒束裝。即日為歸計。魏遂渡淮。兀木問以韓世忠已還否。魏答以某來時。韓世忠正治疊行。即日起離矣。兀木再三審之。知其然。遂稍弛備。世忠乘其懈。回軍奮擊之。兀木大敗。魏良臣皇恐無地。再三求哀云。實見韓將回。不知其結已乃得免。問不能自強。則聽天所命。修德行仁。則天命在我。因說靖康之禍云云。終始為講和所誤。虜人至城下。攻城猶說講和。及高宗渡江。亦只欲講和。問秦檜之所以力欲講和者。亦以高宗之意自欲和也。曰。然。是他知得虜人之意。是欲厭用兵也。當初自虜中來時。已知得虜人厭兵。故這裏迎合高宗之意。那個又投合虜人之意。虜人是時于女玉帛。已自充滿。厭足。非復曩時長驅中原之銳矣。又被這邊殺一兩陣。怕了。兼虜之創業之主已死。他那邊兄弟自相屠戮。這邊兵勢亦稍稍強。所以他亦欲和。趙丞相亦自主和議。但爭河北數州。及不肯屈膝數項禮數爾。至秦丞相便都不與爭。趙丞相是西人。人皆望其有所成就。不知他倒都不進前度。問中興賢相皆推趙

忠簡公何如。曰。看他做來做去。亦只是王茂洪規摹。當時廟論大槩亦主和議。按王庶云。免簽書和議文字劄。貼黃云。契勘臣前項所上章奏。及與王倫議。實有妨嫌。今若不自陳稟。則又如趙鼎劉大中輩。首鼠兩端。於陛下國事何益。使當國久時。未必不出於和。但就和上。却須有些計較。如歲幣稱呼疆土之類。不至一一聽命。如秦檜之樣。老草地和了。後來秦檜之沒意智。乃以不合沮撓和議為詞。貶之。却十分送个好題目與他。問趙好處何如。曰。意思好。又孜孜汲引善類。但其行事。亦有不強人意處。如自平江再都建康。張德遠極費調護。已自定疊了。只因鄺瓊叛去。德遠罷相。趙公再入憂虞。過計。遂決還都。臨安之策。一夜起發。自是不復都金陵矣。問鄺瓊之叛。或云因呂安老折辱之不能安。遂生反心。如不親坐廳。但乘簾露履。以受其參之類。恐無此等事。曰。此亦傳聞之過。又問當時皆歸罪魏公。以為不合罷劉光世。故有此變。曰。光世在當時貪財好色。無與為此。軍政極是弛壞。罷之未為不是。但分付得他兵馬無着落。又云。此事似不偶。然如虜人寇虐。劉豫不臣。但無人敢問着他。至此屯重兵。淮上方謀大舉。以伐劉豫。忽然有此一段踈脫。遂止。又云。如呂安老才氣儘自過人。觀其議論亦甚精確。問鄺瓊叛去之後。聞亦不得志于虜。曰。虜人後來亦用他

為將。但初叛歸于劉豫。虜人却疑豫擁兵大眾。或疑與我為內應。遂有廢豫之謀。鄆瓊叛于淮西。實紹興七年秋。戊辰也。瓊既降劉豫。金人憂其難制。遂廢偽齊。其詔有云。勿謂奪踰田之牛。其罰則不能為托子之友。非棄而之。此天亦滅齊豫也。豈偶然哉。問靖康之禍。若得如前輩之賢者一二。人莫可主張否。曰。也難主張。胡文定謂龜山云。使當時若早用其言。也須救得一半。他這說得極公道。道夫天下不可謂之無人才。如靖康建炎間。未論士大夫。只如盜賊中。是有多少人。宗澤在東京。收拾得諸路豪傑甚多。力請車駕至京。以圖恢復。只緣汪黃一力沮撓。後既無糧食供應。澤又死。遂散而為盜。非其本心。自是當時不曾收拾得他。致為飢寒所迫。以苟旦夕之命。後來諸將立功名者。往往皆是此時招降底人。所以成湯說萬方有罪。在予一人。聖人見得意思。直是如此。按黃卓錄有詳畧。今附云。因言靖康紹興間事曰。天下不可謂之無人才。如高宗初興天下。多少人才。自是高宗不能盡舉而用之。未說士大夫。只盜賊中是有幾介人才。朝廷既不能用。皆散而為盜賊。可惜可惜。宗澤在東京。然招收得諸路豪傑盜賊。力請高宗還都汴。以圖恢復。被汪黃譏誚。一面放散了。皆去而為盜賊。當初高宗能聽宗澤李伯紀輩。須有少進步處。所以古人云。萬方有罪。在

予一人。怪他不得。你既不能用他。又無糧食與他喫。教他如何得其勢。只得散為群盜。以苟旦夕之命而已。其中有多少人材。可惜可惜。問今日事。因及石子重。是以其官召者。時為福州撫幹。因史真翁薦。被召。如廟堂不肯。休湏着去。先生曰。雖是如此。然亦濟得甚事。因舉孟子言。或遠或近。或去或不去。歸紫其身而已。又舉了翁云。在彼者是舉爾所知。在我者是為仁由己。遂言靖康初。張邦昌僭位。呂舜徒為門下侍郎。當時有言他人不足惜。只舜徒可惜者。胡文定記其事云。舜徒雖為邦昌官。却能勸邦昌收偽赦。迎太后垂簾。皆其力也。其人云。終是難分雪。文定記此。只到終是難分雪處便住。更無它語。問只如狄梁公在武后時。當時若無梁公。更害事。曰。梁公只是薦得張柬之數人。它已先死。如梁公為周朝相。舜徒為邦昌官。皆不可以訓。伊川論平勃。謂當以王陵為正是也。如舜徒輩。一生踐履。適遭變故。不幸有此事。今人合下便如此。却不得。雍牘閑評余嘗謂高宗乃太祖之後身也。曲洧舊聞載五代間。有一狂僧謂人曰。汝等望太平。須待定光佛出世。既而太祖即位。當時之人。莫不以為定光佛。至丙午年春。有宗室姓趙。居許下。忽夢梵僧告曰。世且亂。定光佛再出世矣。子有難。當日誦千聲。可免。是年高宗即位。則知二帝皆定光佛無疑。而泊宅編又載

猪頭和尚為定光佛。而太祖屬猪。高宗亦屬猪。已云異矣。余家宣政間。以先大父為郎。曹方留京師。聞高宗聖貌天材。種種過人。遠甚。人皆以小太祖目之。又况太宗在周朝為歸德軍節度使。後遂改歸德軍為應天府。即南京也。高宗亦即位於南京。以至太祖上仙之歲。在亥月。高宗亦以亥月上仙。每事皆同如此。故余獨謂高宗誠太祖之後身焉。嘗試思之。太祖之所以再出世者。殆天命也。其意深且遠矣。蓋自五代之君。多以幼冲而嗣位。其國祚往往皆絕無長久者。太祖既受禪。杜太后獨憂之。至其臨終。勸太祖兄弟相繼而立。令趙普作為誓書。置之甚詳。姑立太宗。未立太祖之子。魏王懼有五代之禍也。至太宗時。秦王已薨矣。後太宗復欲立太祖之後。為趙普者。乃云昔太祖已錯。陛下豈宜又錯。遂竟立真宗。迺遷至于高宗。前後八世。皆太宗之後。若高宗之子。魏公尚在。則天下他日仍歸太宗之後矣。豈不重負於太祖乎。故天復令太祖再出世。為高宗者是矣。高宗皇子魏公已夭。不免別求聖嗣而立之。而壽皇乃秀王之子。正太祖直下諸孫。壽皇即位。天下於是復歸于太祖之後。使天不令太祖再出世。為高宗者。復求壽皇以立。其誰能以天下復歸于太祖之後。而謂高宗非太祖後身可乎。此事余每以為然。他人無有能知之者。獨恨身微言輕。不能一

詣朝廷顯明之。故闕識其事。使後世皆知本朝二帝事體如此。亦非偶然者耳。庚申。宋趙太祖以庚申受周禪。改元建隆。高宗中興。遷都臨安。亦以庚申建國。自秦漢以來。一百三十六帝。惟梁武帝得八十三歲。本朝高宗聖算亦八十一。夫武帝壽數雖高。然未幾遭侯景之亂。狼狽而死。又何足貴邪。而高宗當天下承平之時。其年尚未及六十。乃以萬機之務。盡付之壽皇。方且陶冶聖性。恬養道真。所樂者。文章字畫。琴棋書畫而已。若其他子女之奉。聲色之娛。初未嘗留意。此所以五福兼全。獨過八旬之壽。自秦漢以來。一人而已。苟非胸中有大過人者。詎能至此乎。然則庸常之人。其可以情欲累其身哉。

永樂大典卷之一萬二千九百三十

重錄繼校官侍郎臣秦鳴雷

學士臣胡正蒙

分校官侍讀臣呂旻

書寫儒士臣陳大吉

圈點監生 臣喬承華

臣
歐陽
卿

